

摘藻堂四庫全書薈要

史部

欽定四庫全書薈要

史部
通志卷二十



詳校官員外郎臣楊世綸

欽定四庫全書薈要卷八千九百十九

史部

通志卷二十

宋右廸功郎鄭樵漁仲撰

后妃傳第二

宣穆張皇后 景懷夏侯皇后 景獻羊皇后

文明王皇后 武元楊皇后 武悼楊皇后

左貴嬪胡

貴嬪諸葛夫人

惠賈皇后

惠羊皇后

謝夫人

懷王皇太后

元夏侯太妃

元敬虞皇后

荀豫章君

明穆庾皇后

成恭杜皇后

周太妃

康獻褚皇后

穆章何皇后

哀靖王皇后

廢帝孝庾皇后

簡文宣鄭太

后簡文順王皇后

孝武文李太后

孝武定

王皇后安德陳太后

安僖王皇后

恭思褚

皇后

宋

孝穆趙皇后

孝懿蕭皇后

武敬臧皇后

武

帝張夫人 文章胡太后 少帝司馬皇后 文

元袁皇后

潘淑妃

孝武昭路太后 明宣沈太后

孝武文穆王皇后

宣貴妃

前廢帝何皇后 明恭王

皇后 後廢帝陳太妃 後廢帝江皇后 順陳

太妃 順謝皇后

齊

宣孝陳皇后 高昭劉皇后 武穆裴皇后 韓蘭英

文安王皇后 鬱林王何妃 海陵王王妃 明

敬劉皇后 東昏褚皇后 和王皇后

梁

文獻張皇后 武德郝皇后 武丁貴嬪 文宣
阮太后 簡文王皇后 元帝徐妃 敬夏太后
敬王皇后

陳

武宣章皇后 文沈皇后 廢帝王皇后 宣柳
皇后 後主沈皇后 張貴妃

後魏

神元竇皇后 文帝封皇后 桓惟皇后 平文

王皇后 昭成慕容皇后 獻明賀皇后 道武

慕容皇后 道武宣穆劉皇后 明元昭哀姚皇

后 明元密杜皇后 太武赫連皇后 太武敬

哀賀皇后 景穆恭郁久問皇后 文成文明馮

皇后 文成元李皇后 獻文思李皇后 孝文

貞林皇后 孝文廢馮皇后 孝文幽馮皇后

孝文昭高皇后 宣武順于皇后 宣武高皇后

宣武靈胡皇后 孝明胡皇后 孝武高皇后

文帝文乙弗皇后 文帝悼郁久閭皇后 廢

帝宇文皇后 恭帝若干皇后 孝靜高皇后

北齊

神武明婁皇后 蠕蠕公主郁久閭氏 彭城爾

朱太妃小爾朱氏 上黨韓太妃 馮翊鄭太妃 高陽

游太妃馮娘李娘 文襄敬元皇后琅琊公 文宣李皇后昭段

儀王嬪
薛嬪

孝昭元皇后

武成胡皇后

弘德李夫

人 後主斛律皇后

後主胡皇后

後主穆皇

后 馮淑妃

後周

文元皇后 文宣叱奴皇后 孝閔元皇后 明

敬獨孤皇后 武成阿史那皇后 武李皇后

宣楊皇后 宣朱皇后 宣陳皇后 宣元皇后

宣尉遲皇后 靜司馬皇后

隋

文獻獨孤皇后 宣華陳夫人 容華蔡夫人

煬愍蕭皇后

晉

六宮位號沿革尚矣惟帝祖母號太皇太后帝母號皇太后嫡妃號皇后秦以降不能易焉自夫人以下其稱謂之名與夫增損之數歷二漢及曹氏莫之或一晉武帝受禪採漢魏之制置貴嬪夫人貴人是為三夫人位

視三公淑妃淑媛淑儀脩華脩容脩儀婕妤容華充華
是為九嬪位視九卿其餘有美人才人中才人爵視千
石以下南遷而後庶事倥偬百司庶府率從減省後宮
內職未必皆仍其舊焉宋武代晉省二才人其餘悉用

晉制

案貴嬪魏文帝所制夫人魏武初建魏國所制貴人漢光武所制淑妃魏明帝所制淑媛魏文帝所

制淑儀脩華晉武帝所制脩容魏文帝所制脩儀魏明帝所制婕妤容華前漢舊號麗華晉武帝所制美人漢光武所制及孝武孝建三年省夫人置貴妃位比相國進貴

嬪比丞相貴人比三司以為三夫人又置昭儀昭容昭

華以代脩華脩儀脩容又置中才人充衣以為散位

紫

儀漢元帝所制昭容孝武所制昭華魏明帝所制中才人晉武帝所制充衣前漢舊制

及明帝泰

始二年省淑妃昭華中才人充衣復置脩華脩儀脩容才人良人三年又省貴人置貴姬以備三夫人之數又置昭華增淑容承徽列榮以淑媛淑儀淑容昭華昭儀昭容脩華脩儀脩容為九嬪婕妤容華充華承徽列榮凡五職亞九嬪美人才人良人三職為散役其後帝留心後房擬百官備置內職焉及齊高帝建元元年有司

奏置貴嬪夫人貴人為三夫人脩華脩儀脩容淑妃淑媛淑儀婕妤容華充華為九嬪美人中才人才人為散職三年太子宮置三內職良娣比開國侯保林比五等侯才人比駙馬都尉及永明元年有司奏貴妃淑妃並加金章紫綬佩于鬪玉淑妃舊擬九棘以淑為溫恭之稱妃為亞后之名進同貴妃以比三司夫人之號不殊蕃國降淑媛以比九卿七年復置昭容位在九嬪焉梁武撥亂反正深鑒奢逸配德早終長秋曠位定令制貴

妃貴嬪貴姬為三夫人淑媛淑儀淑容昭華昭儀昭容
脩華脩儀脩容為九嬪婕妤容華充華承徽列榮為五
職美人才人良人為三職東宮置良娣保林為二職及
簡文元帝出自儲蕃或迫在拘繫或逼於寇亂且妃並
先殂不建椒闈陳武光膺天歷以樸素自居故後官員
位其數多闕文帝天嘉之後詔宮職備員其所制立無
改梁舊編之令文以為後法然帝性恭儉嬪嬙不備宣
帝後主無所改作焉今總綴緝起晉訖陳立此篇云

宣穆張皇后諱春華河內平臯人也父汪魏粟邑令母
河內山氏司徒濤之從祖姑也后少有德行智識過人
生景帝文帝平原王幹南陽公主宣帝初辭魏武之命
託以風痺不能動止常暴書遇暴雨不覺自起收之家
惟有一婢見之后恐事泄致禍遂手殺此婢以滅口而
親自執爨帝由是大敬重之其後柏夫人有寵后罕得
進見帝嘗卧疾后往省病帝曰老物可憎何煩出也后
慙恚不食將自殺諸子見后不食亦皆不食帝驚而致

謝后乃止帝退謂人曰老物不足惜誠慮困我好兒耳
魏正始八年崩時年五十九葬洛陽高原陵追贈廣平
縣君咸熙元年追號宣穆妃及武帝受禪追贈為皇后
景懷夏侯皇后諱徽字媛容沛國譙人也父尚魏征南
大將軍母曹氏魏德陽鄉主后雅有識度帝每有所為
必豫籌畫魏明帝世宣帝居上將之重諸子並有雄才
大略后知帝非魏之純臣而后既魏氏之甥帝深忌之
青龍二年遂以鴆崩時年二十四葬峻平陵武帝登阼

初未及追崇弘訓太后每以為言泰始二年始加號謚
后無男生五女

景獻羊皇后諱徽瑜泰山南城人父衛上黨太守后母
陳留蔡氏漢左中郎將邕之女也后聰敏有才行景懷
皇后崩景帝更娶鎮北將軍濮陽吳質女見黜復納后
無子武帝受禪居弘訓宮號弘訓太后泰始九年追贈
蔡氏濟陽縣君謚曰穆咸寧四年太后崩時年六十五
祔葬峻平陵

文明王皇后諱元姬東海郟人也父肅魏中領軍蘭陵侯后性聰慧年八歲誦詩論尤善喪服苟有文義目所一見必貫於心年九歲遇母疾扶持不捨左右衣不解帶者久之每先意候指動中所適由是父母令攝家事每盡其理祖司徒朗甚愛異之曰興吾家者必此女也惜不為男矣年十二朗薨后哀戚哭泣發於自然其父益加敬異既筭歸於文帝生武帝及遼東悼王定國齊獻王攸城陽哀王兆廣漢殤王廣德京兆公主后事宣

帝及穆后曲盡婦道謙冲接下嬪御有序及居父喪身
不勝衣言與淚俱時鍾會以才能見任於文帝后每言
於帝曰會見利忘義好為事端寵過必亂不可大任其
後會果反后之明見類如此武帝受禪尊為皇太后宮
曰崇化初置宮卿重選其職以太常諸葛緒為衛尉太
僕劉原為太僕宗正曹楷為少府后雖處尊位不忘素
業躬執紡績器服無文御浣濯之衣食不參味而敦睦
九族垂心萬物言必典禮浸潤不行帝以后母羊氏未

崇號謚泰始三年下詔褒稱德美使使持節謁者何融
追謚為平陽靖君四年后崩時年五十二合葬崇陽陵
將遷祔帝手疏太后德行命史官為哀策以叙述焉其
後帝追慕不已復下詔曰外曾祖故司徒王朗夫人楊
氏舅氏尊屬鄭劉二從母先后至愛每惟聖善敦睦遺
旨渭陽之感永懷靡及其封楊夫人及從母為鄉君邑
各五百戶太康七年復追贈繼祖母夏侯氏為滎陽縣
君

武元楊皇后諱豔字瓊芝弘農華陰人父文宗見外戚
傳母天水趙氏早卒后依舅家舅妻仁愛親乳養后遣
他人乳其子及長又隨後母段依其家后少聰慧善書
姿質美麗閑於女工有善相者嘗相后當極貴文帝聞
而為世子聘焉甚被寵遇生毗陵悼王軌惠帝秦獻王
東平陽新豐陽平公主武帝即位立為皇后有司奏依
漢故事皇后太子各食湯沐邑四十縣帝以非古典不
許帝以皇太子不堪奉大統密以語后后曰立嫡以長

不以賢豈可動乎初賈充妻郭氏使賂后求以女為太子妃及議太子婚帝欲娶衛瓘女然后盛言賈后有淑德又密使太子太傅荀顗進言上乃聽之后追懷舅氏之恩故顯官趙俊而納俊兄虞女粲於後宮為夫人泰始中帝博採良家以充後宮先下書禁天下嫁娶使中官乘使車給驕騎馳傳州郡召充選者使后簡擇后性妬惟取潔白長大其端正美麗並不見留時卞藩女有美色帝欲納之掩扇謂后曰卞氏女佳后曰藩三世后

族其女不宜枉以卑位帝乃止司徒李允鎮軍大將軍
胡奮廷尉諸葛冲太僕臧權侍中馮蓀秘書郎左思及
世族子女並充三夫人九嬪之列司冀兗豫四州二千
石將吏家補良人以下名家盛族子女多敗衣瘁貌以
避之及后有疾見帝素愛胡夫人恐後立之慮太子不
安臨終枕帝膝曰叔父駿女男允有德色願陛下以備
六宮因悲泣帝流涕許之后泰始十年崩于明光殿絕
于帝膝時年三十七詔賜謚后母趙氏為縣君以繼母

段氏為鄉君命史臣作后哀冊以叙其懷葬于峻陽陵

武悼楊皇后諱芷字季蘭小字男允元后從妹父駿別有傳咸寧二年立為皇后婉嫔有婦德美映椒房甚有寵生渤海殤王早薨遂無子太康九年后率内外夫人命婦躬桑于西郊賜帛各有差太子妃賈氏妬忌帝將廢之后言於帝曰賈公問有勲社稷猶當數世宥之賈妃親是其女正復妬忌之間不足以一眚掩其大德后又數誡厲妃妃不知后之助己因以致恨謂后構之於

帝忿怨彌深及帝崩尊為皇太后賈后凶悖忌后父駿
執權遂誣駿為亂使楚王瑋與東安王繇稱詔誅駿內
外隔塞后題帛為書射之城外曰救太傅者有賞賈后
因宣言太后同逆駿既死詔使將軍荀悝送后於永寧
宮特全后母高都君龐氏之命聽就后居止賈后諷羣
公有司奏曰皇太后陰漸奸謀圖危社稷飛箭繫書要
募將士同惡相濟自絕於天魯侯絕文姜春秋所許陛
下雖懷無已之情臣下不敢奉詔可宣勅王公於朝堂

會議詔曰此大事更詳之有司又奏駿藉外戚之資陰圖凶逆而皇太后內為唇齒協同其謀禍釁既彰背捍詔命阻兵負衆血刃宮省上背祖宗之靈下絕億兆之望昔文姜與亂春秋所貶呂宗叛戾高后降配宜廢皇太后為峻陽庶人中書監張華等以為太后非得罪於先帝者也今黨惡所親為不母於聖世宜依孝成趙皇后故事曰武帝皇后處之離宮以全貴終之恩尚書令下邳王晃等議以皇太后與駿謀危社稷不可復奉承

宗廟配合先帝宜貶尊號廢詣金墉城於是有司奏請
從晃等議廢太后為庶人詔不許有司又固請乃可之
又奏楊駿造亂家屬應誅詔原其妻龐氏以慰太后之
心今太后廢為庶人請以龐付廷尉行刑詔曰聽龐與
庶人相隨有司希賈后旨固請乃從之龐臨刑太后抱
持嗥叫截髮稽顙上表詣賈后稱妾請全母命不見省
初太后尚有侍御十人賈后奪之絕膳而崩時年三十
四在位十五年賈后又信妖巫謂太后必訴冤先帝乃

覆而殞之施諸厭劾符書藥物永嘉元年追復尊號謚
曰悼后別立廟神主不配武帝至成帝咸康七年下詔
使內外詳議衛將軍虞潭議以為悼后既已復位則應
配食世祖未有位號居正而偏祠別室者也此於國典
有虧於是王公卿士等咸從潭議太后始得配食武帝
左貴嬪名芬臨淄人兄思別有傳芬少好學善綴文名
亞於思武帝聞而納之泰始八年拜修儀受詔作愁思
之文因為離思賦以進後策為貴嬪姿陋無寵以才德

見禮體羸多患常居薄室帝每遊華林輒迴輦過之言
及文義辭對清華左右侍聽莫不稱美及元楊皇后崩
芬獻誄於帝咸寧二年納悼后芬於坐受詔作頌及帝
女萬年公主薨帝痛悼不已詔芬作誄其文甚麗帝重
芬詞藻每有方物異寶必詔為賦頌以是屢獲恩賜焉
答兄思詩書及雜賦頌數十篇並行於世胡貴嬪名芳
臨涇人父奮別有傳泰始中帝多簡良家子女以充內
職自擇其美者以絳紗繫臂而芳既入選下殿號泣左

右止之曰陛下聞聲芳曰死且不畏何畏陛下遂再拜
為貴嬪帝每有顧問不飾言辭率爾而對進退方雅時
帝多內寵平吳之後復納孫皓宮人數千自此掖庭殆
將萬人而並寵者甚衆帝莫知所適常乘羊車恣其所
之至便宴寢宮人乃取竹葉插戶以鹽汁灑地而引帝
車然芳最蒙愛幸殆有專房之寵焉侍御服飾亞於皇
后帝嘗與之擣菹爭矢遂傷上指帝怒曰此固將種也
芳對曰北伐公孫西距諸葛非將種而何帝甚有慙色

芳生武安公主諸葛夫人名婉琅邪陽都人父冲字茂
長廷尉卿婉以泰始九年春入宮拜為夫人兄銓字德
林散騎常侍銓弟玫字仁林侍中御史中丞玫婦弟周
穆清河王覃之舅也永嘉初穆與玫勸東海王越廢懷
帝立覃越不許重言之越怒遂斬玫及穆臨刑玫謂穆
曰我語卿何道穆曰今日復何所說時人方知謀出於
穆非玫之意

惠賈皇后諱南風平陽人小名昔父充別有傳初武帝

欲為太子取衛瓘女元后納賈郭親黨之說欲婚賈氏
帝曰衛公女有五可賈公女有五不可衛家種賢而多
子美而長白賈家種妬而少子醜而短黑元后固請荀
顗荀勗並稱充女之美乃定婚始欲聘后妹午午年十
二小太子一歲短小未勝衣更娶南風年十五大太子
二歲泰始八年二月辛卯冊拜為太子妃妬忌多權詐
太子畏而惑之嬪御罕有進幸者帝常疑太子不慧且
朝臣和嶠等多以為言故欲試之盡召東宮大小官屬

為設讌會而密封疑事使太子決之停信待反妃大懼
倩外人作答答者多引古義給使張泓曰太子不學而
答詔引義必責作草主更益譴負不如直以意對妃大
喜語泓便為我好答富貴與汝共之泓素有小才具草
令太子自寫帝省之甚悅先示太子少傅衛瓘瓘大踧
踏衆人乃知瓘先有毀言殿上皆稱萬歲充密遣語妃
云衛瓘老奴幾破汝家妃性酷虐嘗手殺數人或以戟
擲孕妾子隨刃墮地帝聞之大怒已修金墉城將廢之

充華趙粲從容言曰賈妃年少如是婦人之情耳長自當差願陛下察之楊珣亦為之言曰陛下忘賈公問郭荀勗復深救之故得不廢惠帝即位立為皇后生河東臨海始平公主哀獻皇女后暴戾日甚侍中賈模后之族兄右衛郭彰后之從舅並以才望居位與楚王瑋東安公繇分掌朝政后母廣城君養孫賈謐干預國事權侂人主繇密欲廢后賈氏憚之及太宰亮衛瓘等表繇徙帶方奪楚王中候后知瑋怨之乃使帝作密詔令瑋

誅亮以報宿憾模知后凶暴恐禍及己乃與裴頌王衍
謀廢之衍悔而謀寢后遂荒淫放恣與太醫令程據等
亂彰於內外洛南有盜尉部小吏端麗美容止既給廝
役忽有非常衣服衆咸疑其竊盜尉嫌而辯之賈后疎
親欲求盜物往聽對辭小吏云先行逢一老嫗說家有
疾病師卜云宜得城南少年厭之欲暫相煩必有重報
於是隨去上車下帷內簾箱中行可十餘里過六七門
限開簾箱忽見樓闕好屋問此是何處云是天上即以

香湯見浴好衣美食將入見一婦人年可三十五六短
形青黑色眉後有疵見留數夕共寢歡讌臨出贈此衆
物聽者聞其形狀知是賈后慙笑而去尉亦解意時他
人入者多死唯此小吏以后愛之得全而出初后詐有
身內藁物為產具遂取妹夫韓壽子慰祖養之託諒闇
所生故不顯遂謀廢太子以所養代立時洛中謠曰南
風烈烈吹黃沙遙望魯國鬱嵯峨前至三月滅汝家后
母廣城君以后無子甚敬重愍懷每勸厲后使加慈愛

賈謚恃貴驕縱不能推崇太子廣城君恒切責之廣城
後改封宜城宜城病篤后出侍疾太子常往宜城第將
醫出入恂恂盡禮宜城臨終執后手令盡意於太子言
甚切至又曰趙粲及午必亂汝事我死後勿復聽入深
憶吾言后不能遵之遂專制天下威服內外更與粲午
專為奸謀誣害太子衆惡彰著初誅楊駿及汝南王亮
太保衛瓘楚王瑋等皆臨幾專斷宦人董猛參預其事
猛武帝時為寺人監侍東宮得親信於后預誅楊駿封

武安侯猛三兄皆為亭侯天下咸怨及太子廢黜趙王
倫孫秀等因衆怒謀欲廢后后數遣宮婢微服於人間
視聽其謀頗洩后甚懼遂害太子以絕衆望趙王倫乃
率兵入宮使翊軍校尉齊王罔入殿廢后后與罔母有
隙故倫使之后驚曰卿何為來罔曰有詔收后后曰詔
當從我出何詔也后至上閤遙呼帝曰陛下有婦使人
廢之亦行自廢又問罔曰起事者誰曰梁趙后曰繫狗
當繫頸今反繫其尾何得不然至宮西見謚尸再舉聲

而哭遽止倫乃矯詔遣尚書劉弘等持節齎金屑酒賜
后死后在位十一年趙粲賈午韓壽董猛等皆伏誅臨
海公主先封清河洛陽之亂為人所畧傳賈吳興錢温
温以送女女遇主甚酷元帝鎮建業主詣縣自言元帝
誅温及女改封臨海宗正曹統尚之

惠羊皇后諱獻容泰山南城人祖瑾父元之並見外戚
傳賈后既廢孫秀議立后后外祖孫旂與秀合族又諸
子自結於秀故以太安元年立為皇后將入宮衣中有

火成都王穎伐長沙王乂以討元之為名乂敗穎奏廢后為庶人處金墉城陳眎等唱伐成都王大赦復后位張方入洛又廢后方逼遷大駕幸長安留臺復后位永興初張方又廢后河間王顥矯詔以后屢為姦人所立遣尚書田淑勅留臺賜后死詔書累至司隸校尉劉暉與尚書僕射荀藩河南尹周馥不奉詔馳上奏申救之顥見表大怒乃遣陳顏呂朗東救暉暉奔青州后遂得免帝還洛迎后復位後洛陽令何喬又廢后及張方首

至其日復后位會帝崩后慮太弟立為嫂叔不得稱太
后催前太子清河王覃入將立之不果懷帝即位尊后
為惠帝皇后居宏訓宮洛陽敗沒于劉曜曜僭位以為
皇后因問曰吾何如司馬家兒后曰胡可並言陛下開
基之聖主彼亡國之暗夫有一婦一子及身三耳不能
庇之貴為帝王而妻子辱於凡庶之手遣妾爾時實不
思生何圖復有今日妾生於高門常謂世間男子皆然
自奉巾櫛以來始知天下有丈夫耳曜甚寵愛之生曜

二子而死偽謚獻文皇后謝夫人名玫家本貧賤父以屠羊為業玫清惠貞正而有淑姿選入後庭為才人惠帝在東宮將納妃武帝慮太子尚幼未知帷房之事乃遣在東宮侍寢由是得幸有身賈后忌之玫求還西宮遂生愍懷太子年三四歲惠帝不知也入朝見愍懷與諸皇子共戲執其手武帝曰是汝兒也及立為太子拜玫為淑媛賈后不聽太子與玫相見處之一室及愍懷遇酷玫亦被害焉永康初詔改葬太子因贈玫夫人印

綬葬顯平陵

懷王皇太后諱媛姬不知所出初入武帝宮拜中才人
早卒懷王即位追尊曰皇太后

元夏侯太妃名光姬沛國譙人也祖威兗州刺史父莊
字仲容淮南太守清明亭侯妃生自華宗幼而明慧琅
邪武王為世子覲納焉生元帝及恭王薨元帝嗣立稱
王太妃永嘉元年薨于江左葬琅邪國初有讖云銅馬
入海建業期太妃小字銅環而元帝中興於江左焉

元敬虞皇后諱孟母濟陽外黃人也父豫見外戚傳帝
為琅邪王納后為妃無子永嘉六年薨時年三十五帝
為晉王追尊為王后太興三年帝踐阼遣使持節兼太
尉萬勝奉冊追贈皇后璽綬祀以太牢祔于太廟葬建
平陵太寧中明帝追懷母養之恩贈豫妻王氏為邳陽
縣君從母散騎常侍新野王罕妻為平陽縣君豫章君
荀氏元帝宮人也初有寵生明帝及琅邪王裒由是為
虞后所忌自以位卑每懷怨望為帝所譴漸見疎薄及

明帝即位封建安君別立第宅太寧元年帝迎還臺內供奉隆厚及成帝立尊重同於太后咸寧元年薨贈豫章郡君別立廟于京師

臣謹按豫章君生明帝明帝為天子而處之別宅閱兩朝但為封君不正太后之號當時朝臣無有非議之者有以知晉朝之不綱也然史氏載之亦無譏論何邪

明穆庾皇后諱文君潁川鄆陵人也父琛見外戚傳后

性仁惠美姿儀元帝聘為太子妃以德行見重明帝即位立為皇后及成帝立尊后曰皇太后羣臣奏天子幼冲宜依漢和熹皇后故事后辭讓數四不得已而臨朝攝萬幾后兄中書令亮管詔命公卿奏事稱皇太后陛下有司奏贈后父琛及夫人母丘氏后固不聽及蘇峻作逆京都傾覆后見逼辱遂以憂崩年三十二后即位凡六年其後帝孝思罔極贈琛驃騎大將軍儀同三司母丘氏安陵縣君從母荀氏永寧縣君何氏建安縣君

亮表陳先志讓而不受

成恭杜皇后諱陵陽京兆人鎮南將軍預之曾孫也父
又見外戚傳成帝以后奕世名德咸康二年備禮拜為
皇后即日入宮帝御太極前殿羣臣畢賀晝漏盡懸籥
百官乃罷后少有姿色然長猶無齒有來求婚者輒中
止及帝納采之日一夜齒盡生改宣城陵陽縣為廣陽
縣七年三月后崩年二十一外官五日一臨內官旦一
入葬訖止后在位六年無子先是三吳子女相與簪白

花望之如素奈傳言天公織女死為之著服至是而后崩帝下詔山陵之事一從節儉陵中唯潔埽而已不得施塗車芻靈有司奏造凶門相歷及調挽郎皆不許又禁遠近遣使明年元會有司奏廢樂詔廢管絃奏金石如故孝武帝寧康二年以后母裴氏為廣德縣君裴氏名穆長水校尉綽孫太傅主簿遐女太尉王夷甫外孫中表之美高於當世遐隨東海王越遇害無子唯穆渡江遂享榮慶立第南掖門外世所謂杜姥宅云章太妃

周氏以選入成帝宮有寵生哀帝及海西公始拜為貴人哀帝即位詔崇為皇太妃儀服與太后同興寧元年薨帝欲服重尚書僕射江彪啓應服總麻三月謂厭屈私情所以上嚴祖考帝從之

康獻褚皇后諱蒜子河南陽翟人父哀見外戚傳后聰明有器識少以名家入為琅邪王妃及康帝即位立為皇后封母謝氏為尋陽鄉君穆帝即位尊后曰皇太后時帝幼冲未親國政領司徒蔡謨等上奏引漢和熹順

烈及近世明穆故事請太后親攝萬幾太后於是臨朝稱制朝臣皆致敬於哀後帝既冠加元服太后乃歸事反政一依舊典退於崇德宮手詔羣公曰昔以皇帝幼冲從羣后之議既以闇弱又頻丁極艱銜恤歷祀沈憂在疚司徒親尊德重訓救其弊王室之不壞實公是憑帝既備茲冠禮而四海未一五胡叛逆豺狼當路費役日興百姓困窮願諸君子勦力一心輔翼幼主匡救不逮未亡人永歸別宮以終餘齒仰惟家國故以一言託

懷及哀帝海西公之世太后復臨朝稱制桓溫之廢海
西公也太后方在佛屋燒香內侍啓云外有急奏太后
乃出尚倚戶前視奏數行乃曰我本自疑此至半便止
索筆答奏云未亡人懼此百憂感念存沒心焉如割溫
始呈詔草慮太后意異悚動流汗見於顏色及詔出溫
大喜簡文帝即位尊后為崇德太后及帝崩孝武帝幼
冲桓溫又薨羣臣又啓太后攝政太后於是復臨朝至
帝冠婚禮備復歸政稱崇德太后太元九年崩于顯陽

殿年六十一在位凡四十年太后於帝為從嫂朝議疑其服太學博士徐藻議曰資父事君而敬同又禮云其夫屬父道者妻則母道也則夫屬君道妻亦后道矣服后以齊母之義也魯譏逆祀以明尊卑今上躬奉康穆哀皇及靖后之祀致敬同於所天豈可敬之以君道而服廢於本親謂應齊哀菴從之

穆章何皇后諱法倪廬江潯人也父準見外戚傳以名家膺選升平元年八月下璽書曰皇帝咨爾前太尉參

軍何琦混元資始肇經人倫爰及夫婦以奉天地宗廟
社稷謀于公卿咸以宜率由舊典今使使持節太常彪
之宗正綜以禮納采琦答曰前太尉參軍都鄉侯糞土
臣何琦稽首頓首再拜皇帝嘉命訪婚陋族備數採擇
臣從祖弟故散騎侍郎準之遺女未閑教訓衣履若如
人欽承舊章肅奉典制又使兼太保武陵王晞兼太尉
中領軍洽持節奉策立為皇后后無子哀帝即位稱穆
皇后居永安宮及桓玄篡位移后入司徒府路經太廟

后停輿慟哭哀感路人立聞而怒曰天下禪代常理何預何氏女子事邪乃降后為零陵縣君與安帝俱西至巴陵會劉裕建義殷仲文奉后還京都后以遠還欲奉拜陵廟有司以寇難未平奏停永興二年崩年六十六在位凡四十八年

哀靖王皇后諱穆之太原晉陽人也司徒左長史濛之女后初為琅邪王妃哀帝即位立為皇后追贈母爰氏為安國鄉君后在位三年無子興寧二年崩

廢帝孝庾皇后諱道憐潁川鄆陵人也父冰自有傳初為東海王妃及帝即位立為皇后太和六年崩葬于敬平陵帝廢為海西公追賤后曰海西公夫人太元九年海西公薨于吳又以后合葬于吳陵

簡文宣鄭太后諱阿春河南滎陽人也世為冠族祖合臨濟令父愷字祖元安豐太守后少孤無兄弟唯姊妹四人后最長先適渤海田氏生一男而寡依于舅濮陽吳氏元帝為丞相敬后先崩將納吳氏女為夫人后及

吳氏女並游後園或見之言於帝曰鄭氏女雖嫠賢於
吳氏遠矣建武元年納為琅邪王夫人甚有寵后雖貴
幸而恒有憂色帝問其故對曰妾有妹中者已適長沙
王褒餘二妹未有所適恐姊為人妾無復求者帝因從
容謂劉隗曰鄭氏二妹卿可為求佳對使不失舊隗舉
其從子傭娶第三者以小者適漢中李氏皆得舊門帝
召王褒為尚書郎以悅后意后生琅邪悼王簡文帝尋
陽公主帝稱尊號后雖為夫人詔太子及東海武陵王

皆母事之帝崩后稱建平國夫人咸和元年薨簡文帝時為琅邪王後自琅邪徙封會稽追號后曰會稽太妃及簡文帝即位未及追尊臨崩封皇子道子為琅邪王領會稽國奉太妃祀太元十九年孝武帝迷遵先志上太妃尊號曰簡文太后立廟於太廟路西陵曰嘉平

簡文順王皇后諱簡姬太原晉陽人也父遐見外戚傳后以冠族初為會稽王妃生子道生為世子永和四年母子並失帝意俱被幽廢后遂以憂薨咸安二年孝武

帝即位追尊曰順皇后合葬高平陵追贈后父遐特進光祿大夫加散騎常侍

孝武文李太后諱陵容本出微賤始簡文帝為會稽王有三子俱夭自道生廢黜獻王早世其後諸姬絕孕將十年帝令卜者扈謙筮之曰後房中有一女當育二貴男其一終盛晉室時徐貴人生新安公主以德美見寵帝常冀其有娠而彌年無子會有道士許邁者朝臣時望多稱其得道帝嘗從容問焉答曰邁是好山水人本

無道術斯事豈所能判但陛下德厚慶深宜隆奕代之
緒當從扈謙之言以存廣接之道帝然之更加採納又
數年無子乃令善相者召諸愛妾而示之皆云非其人
又悉以諸婢媵示焉時后為宮人在織坊中形長而色
黑宮人皆謂之崑崙既至相者驚云此其人也帝以大
計召之以侍寢后數夢兩龍枕膝日月入懷意以為吉
祥向儕類說之帝聞而異焉遂生孝武帝及會稽文孝
王鄱陽長公主及孝武帝初即位尊為淑妃太元三年

進為貴人九年又進為夫人十二年加為皇太妃十九

年八月辛巳帝臨軒遣兼太保劉耽尊為皇太后稱崇
訓宮安帝立尊為太皇太后隆安四年崩於含章殿帝
及太后百官皆服齊衰期葬修平陵神主祔宣太后廟
孝武定王皇后諱法慧哀靖皇后之姪也父蘊見外戚
傳初帝將納后訪于公卿時蘊子恭以弱冠見僕射謝
安安深重之既而謂人曰昔毛嘉見耻魏朝楊駿幾傾
晉室若帝納后有父者唯廕望如王蘊乃可既而訪蘊

女容德淑令乃舉以應選寧康三年中軍將軍桓沖等
奏稱蘊女天性柔順四業允備且盛德之胄美善先積
臣等參議可以配德乾元恭承宗廟徽音六宮母儀天
下於是帝始納焉封蘊妻劉氏為樂平鄉君后嗜酒驕
妬帝患之乃召蘊於東堂具說后過令加訓誡蘊免冠
謝焉后乃少自改飭太元五年崩年二十一葬隆平陵
安德陳太后諱歸女松滋潯陽人也父廣以倡進仕至
平昌太守后以美色能歌彈入宮為淑媛生安恭二帝

太元十五年薨贈夫人追崇曰皇太后神主祔于宣太后廟陵曰熙平

安僖王皇后諱神愛琅邪沂人也父獻之見列傳母新安愍公主后以太元末納為太子妃安帝立冊為皇后無子義熙八年崩於徽音殿時年二十九葬休平陵恭思褚皇后諱靈媛河南陽翟人義興太守爽之女也后初為琅邪王妃元熙元年立為皇后生海鹽富陽公主及帝禪位于宋降為零陵王妃宋元嘉十三年崩年

五十三祔葬冲平陵

宋

孝穆趙皇后諱安宗下邳僮人也父裔平原太守后以
晉穆帝升平四年嬪于孝皇帝以產武帝殂于丹徒官
舍葬晉陵丹徒縣東鄉諫壁里雩山宋受禪追崇號謚
陵曰興寧永初三年有司奏追贈裔光祿大夫加金章
紫綬裔命婦孫氏封豫章郡建昌縣君其年又追封裔
臨賀縣侯裔子倫之自有傳

孝懿蕭皇后諱文壽蘭陵人也父卓字子略洮陽令后為孝皇帝繼室生長沙景王道憐臨川烈武王道規義熙七年拜豫章公太夫人武帝為宋公宋王又加太妃太后之號帝踐阼尊曰皇太后居宣訓宮上以恭孝為行奉太后素謹及即大位春秋已高每旦朝太后未嘗失時刻少帝即位加崇曰太皇太后景平元年崩于顯陽殿年八十一遺令漢世帝后陵皆異處今可於瑩域之內別為一壙一遵往式乃開別壙與興寧合墳初武

帝微時貧約過甚孝皇之殂葬禮多闕帝遺旨太后百歲後不須祔葬至是故稱后遺令云卓初與趙裔俱贈金紫光祿大夫又追封封陽縣侯妻下邳趙氏封吳郡壽昌縣君卓子源之襲爵源之見子思話傳

武敬臧皇后諱愛親東莞人祖汪尚書郎父儁郡功曹后配武帝生會稽宣長公主興弟武帝以儉正率下后恭謹不違及武帝興復晉室居上相之重而后器服麤素不為親屬請謁義熙四年正月甲子殂於東城年四

十八追贈豫章公夫人還葬丹徒武帝臨崩遺詔留葬
建業於是備法駕迎梓宮祔葬初寧陵宋初追贈雋金
紫光祿大夫妻高密叔孫氏封永陵平鄉君雋子燾熹
熹子質並自有傳

武帝張夫人諱闕不知何許人也生少帝及義興泰長
公主惠媛永初元年拜夫人少帝即位有司奏上尊號
為皇太后宮曰永樂少帝廢太后還璽綬隨居吳縣文
帝元嘉元年拜營陽國太妃二年薨

文章胡太后諱道女淮南人也義熙初武帝所納文帝生五年被譴賜死葬丹徒武帝踐阼追贈健仔文帝即位有司奏上尊號曰章皇太后陵曰熙寧立廟建業

少帝司馬皇后諱茂英晉恭帝女也初封海鹽公主少帝以公子尚馬宋初拜太子妃少帝即位為皇后元嘉元年降為營陽王妃又為南豐王太妃十六年薨

文元袁皇后諱齊媯陳郡陽夏人光祿大夫湛之庶女也母本卑賤后年五六歲方見舉後適文帝拜宜都王

妃生子邵東陽獻公主英娥上待后恩禮甚篤袁氏貧薄后每就上求錢帛以贍之上性節儉所得不過三五萬三五匹後潘淑妃有寵愛傾後宮咸言所求無不得后聞之未知信否乃因潘求三十萬錢與家以觀上意宿昔便得因此恚恨稱疾不復見上遂恚恨成疾元嘉十七年疾篤上執手流涕問所欲言后視之良久乃引被覆面崩于顯陽殿年三十六上甚悼痛之詔前永嘉太守顏延之為哀策文甚麗及奏上自益撫存悼亡

感今懷昔八字以致意焉有司奏謚宣皇后上特詔謚曰元初后生劭自詳視之使馳白帝曰此兒形貌異常必破國亡家不可舉使欲殺之文帝狼狽至后殿戶外手掇幔禁之乃止后亡後常有小小靈應沈美人者明帝所生也常以非罪見責應賜死從后昔所住徽音殿前度此殿有五間自后崩後常閉美人至殿前流涕大言曰今日無罪就死先后若有靈當知之殿諸窓戶應聲豁然開職掌者遽白文帝帝驚往視之美人乃得釋

大明五年孝武乃詔追后之所生外祖親王夫人為豫章郡新淦平樂鄉君又詔趙蕭臧家及光祿袁敬公平樂鄉君墓先未給塋戶各給蠻戶三以供灑埽后父湛之自有傳潘淑妃者本以貌進始未見賞文帝好乘羊車經諸房淑妃每莊飾褰帷以候并密令左右以鹹水灑地帝每至戶羊輒舐地不去帝曰羊乃為汝徘徊况於人乎於此愛傾後宮

孝武昭路太后諱惠男丹陽建康人也以色貌選入後

宮生孝武帝拜為淑媛及年長無寵常隨孝武出蕃孝武即位有司奏奉尊號曰太子宫曰崇憲太后居顯陽殿上於閨門之內禮敬甚寡有所御幸或留止太后房內故人間咸有醜聲宮掖事秘亦莫能辨也孝建二年追贈太后父興之散騎常侍興之妻餘杭縣廣昌鄉君大明四年太后弟子撫軍參軍瓊之上表自陳有司承旨奏贈瓊之父道慶給事中瓊之及弟休之茂之並居顯職太后頗與政事賜與瓊之等財物皆累千金居處

器服與帝子相伴大明五年太后隨上巡南豫州妃主
以下並從廢帝立號太皇太后明帝踐阼號崇德太后
初明帝失所生為太后所攝養撫愛甚篤及即位供奉
禮儀不異舊日有司奏宜別居外宮詔欲親奉晨昏盡
權閨禁不如所奏及聞義嘉難作太后心幸之延上飲
酒置毒以進侍者引上衣上寤起以其卮上壽是日太
后崩祕之喪事如禮遷殯東宮題曰崇憲宮又詔述太
后恩慈特齊哀三月以申追遠謚曰昭皇太后葬孝武

陵東號曰修寧陵先是晉安王子勛未平巫者謂宜開
昭太后陵毀去梓宮以厭勝修復倉卒不得如禮上性
忌慮將來致災泰始四年夏詔有司曰崇憲昭太后修
寧陵地大明之世久所考卜前歲遭諸蕃之難禮從權
宜未暇營改而瑩隧之所山原卑陋可式遵舊典以禮
改創奏請修寧陵元宮補葺毀壞權施油殿暫出梓宮
事畢即定詔可廢帝景和中又追贈興之侍中金紫光
祿大夫謚曰孝侯道慶光祿大夫開府儀同三司謚曰

敬侯道慶女為皇后以休之為侍中

明宣沈太后諱容姬不知何許人也為文帝美人生明
帝拜健仔元嘉三十年卒葬建康之莫府山孝武即位
追贈湘東國太妃明帝即位有司奏上尊號為皇太后
諡曰宣陵號崇寧

孝武文穆王皇后諱憲嫔琅邪臨沂人也元嘉二十年
拜武陵王妃生廢帝豫章王子尚山陰公主楚玉臨淮
康哀公主楚佩皇女楚琇康樂公主修明孝武在蕃后

甚寵異及即位為皇后焉大明四年后率六宮躬桑于西郊皇太后觀禮妃主以下並加班錫廢帝即位尊曰皇太后宮曰永訓其年崩于含章殿祔葬景寧陵父偃別有傳殷淑儀者南郡王義宣女也麗色巧笑義宣敗後帝密取之寵冠後宮假姓殷氏左右宣泄者多死故當時莫知所出及薨帝常思見之遂為通替棺欲見輒引替覩屍如此積日形色不異追贈貴妃謚曰宣及葬給輜輶車虎賁班劍鑾輅九旒黃屋左纛前後部羽葆

鼓吹上自南掖門臨過喪車悲不自勝左右莫不掩泣
上痛愛不已精神罔罔頗廢政事每寢先於靈牀酌奠
酒飲之既而慟哭不能自反又諷有司奏曰據春秋仲
子非魯惠公元嫡尚得考別宮今貴妃蓋天秩之崇班
理應創廟乃立別廟於都下時有巫者能見鬼說帝言
貴妃可致帝大喜令召之有少頃果於帷中見形如平
生帝欲與之言默然不對將執手奄然便歇帝尤哽恨
於是擬李夫人賦以寄意焉謝莊作哀策文奏之帝卧

覽讀起坐流涕曰不謂當今復有此才都下傳寫紙墨
為之貴或云貴妃是殷琰家人入義宣家義宣敗入宮
云

前廢帝何皇后諱令婉廬江潯人也孝建三年納為皇
太子妃大明五年薨于東宮徽光殿謚曰獻妃廢帝即
位追崇曰獻皇后明帝踐阼遷后與廢帝合葬龍山北
后父瑀字幼玉晉尚書左僕射澄曾孫也瑀尚武帝少
女豫康長公主諱次男公主先適徐喬美容色聰敏有

智數文帝世禮待特隆瑀豪競於時與平昌孟靈休東海何勗等並以輿馬相尚公主與瑀情愛隆密何氏踈戚莫不霑被恩禮瑀位右衛將軍主薨瑀墓開孝武追贈金紫光祿大夫子邁尚文帝第十六女新蔡公主諱英媚邁少以貴戚居顯官好犬馬馳逐多聚才力士位南濟陰太守廢帝納公主於後宮偽言薨殞殺一婢送出邁第殯葬行喪禮常疑邁有異圖邁亦招聚同志欲因行廢立事覺見誅明帝即位追封建寧縣侯瑀兄子

衍性躁動位黃門郎拜竟求司徒司馬得司馬復求太子右率拜一二日復求侍中旬月之間求進無已不得侍中以怨罵賜死

明恭王皇后諱貞風琅邪臨沂人也初拜淮陽王妃明帝改封又為湘東王妃生晉陵長公主伯姒建安長公主伯媛明帝即位立為皇后上嘗宮內大集而裸婦人觀之以為歡笑后以扇障面獨無所言帝怒曰外舍家寒乞今共作笑樂何獨不視后曰為樂之事其方自多

豈有姑姊妹集聚而裸婦人形體以此為樂外舍之為
歡適與此不同帝大怒令后起后兄揚州刺史景文以
此事語從舅陳郡謝綽曰后在家為孱弱婦人不知今
段遂能剛正如此廢帝即位尊為皇太后宮曰弘訓廢
帝失德太后每加勗譬始猶見順後狂慝稍甚太后嘗
賜帝玉柄毛扇帝嫌毛扇不華因此欲加醜害令太醫
煮藥左右止之曰若行此事官便作孝子豈得出入狡
獪帝曰汝語大有理乃止順帝即位齊高帝執權宗室

劉晃劉綽卜伯興等有異志太后頗與相關順帝禪位
太后與帝遜于東邸因遷居丹陽宮拜汝陰王太妃順
帝殂于丹陽更立第都下建元元年薨于第追加謚葬
以宋禮后父僧朗別有傳

後廢帝陳太妃諱妙登丹陽建康屠家女也孝武嘗使
尉司採訪人間子女有姿色太妃家在建康縣居有草
屋兩三間上出行問尉曰御道那得此屋當由家貧賜
錢三萬令起瓦屋尉自送錢與之家人並行唯太妃在

家時年十二三尉見其美即以白孝武於是迎入宮在
路太后房內經二年再呼不見幸太后因言於上以賜
明帝始有寵一年衰歇以賜李道兒尋又迎還生廢帝
先是人間言明帝不男故皆呼廢帝為李氏子廢帝後
每微行自稱李將軍或自謂李統明帝即位拜貴妃秩
同皇太妃廢帝踐阼有司奏上尊號曰皇太妃輿服一
如晉孝武李太妃故事宮曰弘化置家令一人改諸國
太妃曰太姬昇明初降為蒼梧王太妃

後廢帝江皇后諱簡珪濟陽考城人也太始五年明帝
訪太子妃而雅信卜數名家女多不合江氏雖為華族
而后父祖並已亡弟又弱小以卜筮吉故為太子納之
六年拜皇太子妃諷朝士州郡皆令獻物多者將值百
金始興太守孫奉伯止獻琴書其外無餘物上大怒封
藥賜死既而原之太子即帝位立為皇后帝既廢降后
為蒼梧王妃祖智深自有傳

順陳太妃諱法容丹陽建康人也明帝素肥晚年痿疾

不能內御諸弟姬人有懷孕者輒取以入宮及生男皆殺其母而與六宮所愛者養之順帝桂陽王休範子也以陳昭華為母明帝崩昭華拜安成王太妃順帝即位進為皇太妃順帝禪位去皇存太妃之號

順謝皇后諱楚境陳郡陽夏人右光祿大夫莊之孫也父颺車騎功曹昇明二年立為皇后順帝禪位降為汝陰王妃祖莊自有傳

南齊

宣孝陳皇后諱道止臨淮東陽人魏司徒矯之後也后
家貧少勤織作家人矜其勞或止之后終不改嫁于宣
帝宣帝庶生子衡陽元王道度始安貞王道生后生高
帝年二歲乳人乏乳后夢人以兩甌麻粥與之覺而乳
驚因此豐足宣帝從任在外后常留家有相者謂后曰
夫人有貴子而不之見后歎曰我三子誰當應之呼高
帝小字曰政應是汝耳宣帝殂後后親執勤婢使有過
皆恕而不問高帝雖從宦而家業本貧為建康令時明

帝等冬月猶無縑纊而奉膳甚厚后每撤去兼肉曰於我過足矣殂于縣舍昇明二年追贈竟陵公國太夫人齊國建為齊國太妃並密印書青綬祠以太牢建元元年追尊孝皇后贈外祖父肇之金紫光祿大夫謚敬侯后母胡氏為永昌縣靖君永明九年詔太廟四時祭宣皇帝薦起麵餅鴨膾孝皇后薦笋鴨卵脯醬炙白肉高皇帝薦肉膾菹羹昭皇后薦茗糲炙魚並平生所嗜也高昭劉皇后諱智容廣陵人也祖元之父壽之並員外

郎后母桓氏夢吞玉勝生后時有紫光滿室以告壽之
壽之曰恨非是男桓笑曰雖女亦足興家矣后寢卧見
有羽蓋蔭其上家人試察之常見其上掩藹如似雲氣
年十七裴方明為子求昏酬許已定后夢見先有迎車
至猶如常家迎法后不肯去次有迎至龍旗豹尾有異
於常后喜而從之既而與裴氏不成婚竟嬪于上嚴毅
有軌度造次必依禮法生太子及豫章王疑太子初在
孕后嘗歸寧遇家奉祠爾日陰晦失曉舉家狼狽共營

祭食后助炒胡麻始復內薪未及索火火便自然宋泰
豫元年殂歸葬宣帝墓側則泰安陵也門生王清與墓
工始下插有白兔跳起尋之不得及墳成兔還栖其上
昇明二年贈竟陵公國夫人三年贈齊國妃印綬齊建
元元年尊謚昭皇后二年贈后父壽之金紫光祿大夫
母桓氏上虞都鄉君

武穆裴皇后諱惠昭河東聞喜人也祖封之給事中父
璣之左軍參軍后少與豫章王妃庾氏為姊妹庾氏勤

女工奉事高昭后恭謹不倦后不能及故不為舅姑所
重武帝亦薄焉性剛嚴竟陵王子良妃袁氏布衣時有
過后每加訓罰昇明三年為齊世子妃建元元年為皇
太子妃二年后薨謚穆妃葬休安陵時議欲立石誌王
儉曰石誌不出禮起宋元嘉中顏延之為王球石誌素
族無銘策故以紀行自爾以來共相祖習儲妃之重禮
絕恒例既有哀策不煩石誌從之武帝即位追尊皇后
贈父璣之金紫光祿大夫后母檀氏餘杭廣昌鄉元君

舊顯陽昭陽二殿太后皇后所居也永明中無太后皇
后羊貴嬪居昭陽殿西范貴妃居昭陽殿東寵姬荀昭
華居鳳華柏殿宮內御所居壽昌畫殿南閣置白鷺鼓
吹二部乾光殿東西頭置鐘磬兩箱皆宴處也上數遊
幸諸苑圍載宮人從從車置內深隱不聞端門鼓漏聲
置鐘於景陽樓上應五鼓及三鼓宮人聞鐘聲早起莊
飾車駕數幸琅邪城宮人常從早發至湖北埭雞始鳴
故呼為雞鳴埭婦人吳郡韓蘭英有文辭宋孝武時獻

中興賦被賞入宮宋明帝時用為宮中職僚及武帝以
為博士教六宮書學以其年老多識呼為韓公云

文安王皇后諱寶明琅邪臨沂人也祖韶之吳興太守
父暕之太宰祭酒宋世高帝為文惠太子納后建元元
年為南郡王妃四年為皇太子妃無寵太子宫人製新
麗衣裳及首飾而后牀帷陳故古舊釵鑷十餘枚永明
十一年為皇太妃太孫鬱林即位尊為皇太后稱宣德
宮置男左右三十人前代所未有也贈后父暕之金紫

光祿大夫母桓氏豐安縣君其年十二月備法駕謁太廟明帝即位出居鄱陽王故第以第為宣德宮永元三年梁武帝定建業迎入宮后稱制至禪位遜居外宮梁天監十一年薨葬崇安陵諡曰安后祖韶之自有傳

鬱林王何妃諱婧英廬江潯人撫軍將軍戢女也初將納為南郡王妃文惠太子嫌戢無男門孤不欲與昏王儉以南郡王妃便為將來外戚唯須高胄不須彊門今何氏蔭華族弱實允外戚之義永明三年乃成婚妃稟

性淫亂南郡王所與無賴人遊妃擇其美者皆與交歡
南郡王侍書人馬澄年少色美甚為后悅常與鬪腕較
力南郡王以為歡笑澄者本剡縣寒人嘗於南岸逼略
人家女為秣陵縣所錄南郡王語縣散遣之澄又逼求
姨女為妾姨不與澄詣建康令沈徽孚訟之徽孚曰姨
女可為婦不可為妾澄曰僕父為給事中門戶既成姨
家猶是寒賤政可為妾耳徽孚訶而遣之十一年為皇
太孫妃又有女巫子楊珉之亦有美貌妃尤愛悅之與

同寢處如伉儷及太孫即帝位為皇后封后嫡母劉為高昌縣都鄉君所生母宋為餘杭廣昌鄉君后将拜鏡在牀無因墮地其冬與太后同日謁太廟楊珉之為帝所幸常居中侍明帝為輔與王晏徐孝嗣王廣之並面請不聽又令蕭謏坦之固請皇后與帝同席坐流涕覆面謂坦之曰楊郎好年少無罪過何可枉殺坦之耳語於帝曰此事別有一意不可令人聞帝謂皇后為阿奴曰阿奴暫去坦之乃曰外間並云楊珉之與皇后有異

情彰聞邇遐帝不得已乃為勅坦之馳報明帝即令建
康行刑既而果有勅原之而珉之已死后既淫亂又與
帝相愛褻故帝恣之又迎后親戚入宮賞賜人百數十
萬以武帝曜靈殿處后家屬帝廢后貶為王妃父戢自
有傳

海陵王王妃諱韶明琅邪臨沂人太常慈之女也永明
八年納為臨沂公夫人鬱林王即位為新安王妃延興
元年為皇后其年降為海陵王妃妃父慈自有傳

明敬劉皇后諱惠端彭城人光祿大夫道弘孫也高帝為明帝納之建元三年除西昌侯夫人永明七年卒葬江乘縣張山延興元年贈宣城王妃明帝即位追尊敬皇后贈父通直郎景猷為金紫光祿大夫母王氏平陽鄉君明帝崩改葬祔于興安陵

東昏褚皇后諱令璩河南陽翟人太常澄之女也建武二年納為皇太子妃而無寵帝謂左右曰若得如山陰主無恨矣山陰主明帝長女也後遂與之為亂明年妃

謁敬后廟東昏即位為皇后帝寵潘妃后不被遇黃淑
儀生太子誦而卒東昏廢后及誦並為庶人后父澄自
有傳

和王皇后諱薺華琅邪临沂人太尉儉之孫也初為隨
王妃中興元年為皇后帝禪位后降為妃妃祖儉自有
傳

梁

文獻張皇后諱尚柔范陽方城人也父穆之娶文帝從

姑而生后后以元嘉中嬪於文帝生長沙宣武王懿永陽昭王敷次生武帝方孕忽見庭前菖蒲花光采非常驚報侍者侍者皆云不見后曰嘗聞見菖蒲花者當富貴因取吞之是月生武帝將產之夕后見庭內若有衣冠陪列焉次生衡陽宣王暢義興昭長公主令嫔后以宋泰始七年殂於秣陵縣同夏里舍葬晉陵武進縣東城里山天監元年五月甲辰追上尊號為皇后諡曰文獻穆之字思靜晉司空華六世孫也少方雅有識鑒初

為員外散騎侍郎深被始興王濬引納穆之鑒其禍萌
求為交阯太守政有異績宋文帝將以為交州刺史會
病卒子弘籍字真藝齊初為鎮西參軍卒於官梁武踐
阼追贈穆之光祿大夫加金章紫綬贈弘籍廷尉卿弘
籍無子從父弟弘策以子纘嗣別有傳

武德郁皇后諱徽高平金鄉人也祖紹宋國祭酒領東
海王師父曄太子舍人早卒后母宋文帝女尋陽公主
也方娠夢當生貴子及后生有赤光照室器物甚明家

人怪之巫言此女光高將有所妨乃於水濱祓除之后
幼明慧善隸書讀史傳女工之事無不閑習宋後廢帝
將納為后齊初安陸王緬又欲結婚郗氏並辭以女疾
乃止齊建元末嬪于武帝生永興公主王姚永世公主
玉婉永康公主玉環及武帝為雍州刺史殂于襄陽官
舍年三十二其年歸葬南徐州南東海武進縣東城里
山中興二年武帝為梁公齊帝贈后為梁公妃及武帝
踐阼追崇為皇后諡曰德陵曰修陵后父暉贈金紫光

祿大夫后酷妬忌及終化為龍入于後宮通夢於帝或見形光彩照灼帝體將不安龍輒激水騰涌於露井上為殿衣服委積常置銀鹿盧金瓶灌百味以祀之故帝卒不置后

武丁貴嬪諱令光譙國人也祖父從官襄陽因居沔北五女村寓於劉惠明廡下貴嬪生於樊城初產有神光之異紫氣滿室故以光為名相者云當大貴少時與鄰女月下紡績諸女並患蚊蚋而貴嬪不之覺也鄉人魏

蓋德將聘之未及成而武帝鎮樊城嘗登樓以望見漢
濱五采如龍下有女子擘紉則貴嬪也又丁氏因人以
相者言聞之於帝帝贈以金環納之時年十四貴嬪生
而有赤誌在左臂療之不滅又體多疣子至是無何並
失所在德后酷忌遇貴嬪無道使日舂五斛舂每中程
若有助者被遇雖嚴蓋小心祇敬嘗於供養經案側髻
鬢若見神人心獨異之武帝起兵之日昭明太子始誕
天監元年五月有司奏為貴人未拜其年八月又奏為

貴嬪位在三夫人之上居顯陽殿及太子定位有司奏
曰禮母以子貴皇儲所生不容無敬於是以皇太子之
禮禮貴嬪言則稱令貴嬪性仁恕及居宮接馭自下皆
得其歡心不好華飾器服無珍麗未嘗為親戚私謁及
武帝大弘佛教貴嬪奉而行之屏絕滋腴長進蔬膳受
戒日甘露降于殿前方一丈五尺帝所立經義皆得其
指歸尤精淨名經所受供賜悉以充法事普通七年十
一月庚辰薨移殯於東宮臨雲殿時年四十二詔吏部

郎張纘為哀冊文有司奏謚曰穆葬寧陵祔于小廟簡
文即位追崇曰太后貴嬪父道遷天監初為歷陽太守
廬陵威王之生武帝謂之曰賢女復育一男答曰莫道
賭狗子世人以為笑後位兗州刺史宣城太守

文宣阮太后諱令羸會稽餘姚人也本姓石初齊始安
王遙光納焉遙光敗入東昏宮建康城平為武帝采女
在孕夢龍罩其牀天監六年八月生元帝于後宮是日
大赦尋拜為修容賜姓阮氏常隨元帝出蕃大同六年

六月薨于江州正寢時年六十七其年十一月歸葬江寧縣通望山謚曰宣元帝即位有司奏追崇為文宣太后還祔小廟承聖二年追贈太后父齊故奉朝請石靈寶散騎常侍左衛將軍封武康縣侯母陳氏武康侯夫人

簡文王皇后諱靈賓琅邪臨沂人也祖儉齊太尉南昌文憲公父騫金紫光祿大夫南昌安侯后幼而柔明叔父暕見之曰吾家女師也天監十一年拜晉安王妃生

哀太子大器南郡王大連長山公主妙碧大通三年十月拜皇太子妃太清三年三月薨于永福省時年四十五其年簡文即位追崇為皇后謚曰簡大寶元年九月葬莊陵

元帝徐妃諱昭佩東海郟人也祖考嗣齊太尉枝江文忠公父緄侍中信武將軍妃以天監十六年十二月拜湘東王妃生世子方等益昌公主含貞妃無容質不見禮帝三二年一入房妃以帝眇一目每知帝將至必為

半面粉以俟帝見則大怒而出妃性嗜酒多湛醉帝還房必吐衣中與荊州後堂瑤光寺智遠道人私通酷妬忌見無寵之妾便交杯接坐纔覺有娠者即手加刀刃帝左右暨季江有姿容又與淫通季江每歎曰栢直狗雖老猶能獵蕭溧陽馬雖老猶駿徐娘雖老猶尚多情時有賀徽者美色妃要之於普賢尼寺書白角枕為詩相贈答既而貞惠太子方諸母王氏寵愛未幾而終元帝歸咎於妃及方等死愈見疾太清三年遂逼令自殺

妃知不免乃投井死帝以屍還徐氏謂之出妻葬金陵
瓦官寺帝制金樓子述其淫行初妃嫁夕車至西州而
疾風大起發屋折木無何雪霰交下帷簾皆白及長還
之日又大雷震西州聽事兩柱俱碎帝以為不祥後果
不終婦道

敬夏太后會稽人也普通中納于湘東王宮生敬帝承
聖元年冬拜晉安王國太妃紹泰元年尊為太后明年
冬降為江陰國太妃

敬王皇后琅邪臨沂人也承聖元年十一月拜晉安王妃紹泰元年十月拜皇后明年降為江陰王妃父儉自有傳

陳

武宣章皇后諱要兒吳興烏程人本姓鈕父景明為章氏所養因改姓焉后母蘇嘗遇道士以小龜遺已光彩五色曰三年有徵及期后生紫光照室因失龜所在后少聰慧美容儀手爪長五寸色並紅白每有期功之服

則一爪先折武帝先娶同郡錢仲方女早卒後乃聘后
后善書計能誦詩及楚辭武帝為長城縣公后拜夫人
帝自廣州南征交趾命后與衡陽王隨文帝由海道歸
于長城侯景之亂為景所囚及景平武帝踐阼立為皇
后追贈后父梁散騎侍郎景明特進金紫光祿大夫加
金章紫綬拜后母蘇安吉縣君二年安吉君卒與后父
葬吳興明年追封后父為廣德縣侯謚曰溫武帝崩后
與中書舍人蔡景歷定計祕不發喪時衡陽王昌未至

乃召文帝及即位尊后為皇太后宮曰慈訓廢帝即位
后為太皇太后光大二年后下令黜廢帝為臨海王命
宣帝嗣立大建元年復為皇太后二年三月丙申崩于
紫極殿時年六十五其年四月羣臣上謚曰宣祔葬萬
安陵后親屬無在朝者唯本族兄鈕洽官至中散大夫
文沈皇后諱妙容吳興武康人也父法深梁安南中錄
事參軍后年十歲餘以梁大同中歸于文帝武帝之討
侯景文帝時在武興及后並被收景平乃獲免武帝踐

阼后為臨川王妃文帝即位為皇后追贈后父法深光祿大夫加金章紫綬封建城縣侯謚曰恭追贈后母高為綏安縣君謚曰定廢帝即位尊后為皇太后宮曰安德時宣帝與僕射到仲舉舍人劉師知等並受遺輔政師知與仲舉恒居禁中參決衆事而宣帝為揚州刺史與左右三百人入居尚書省師知忌宣帝權重矯勅令還東府理州務宣帝將出毛喜止之曰今若出外便受制於人如曹爽願作富家公不可得也宣帝乃稱疾召

師知留與語使毛喜先入言之於后后曰今伯宗年幼
政事並委二郎此非我意又言於廢帝廢帝曰此自師
知等為非朕意也喜出報宣帝帝因囚師知自入見后
及帝極陳師知之短仍自草敕請畫以師知付廷尉其
夜於獄賜死自是政歸宣帝后憂悶計無所出乃密賂
宦者蔣裕令誘建安人張安國使據郡反冀因此圖帝
安國事發被誅時后左右近侍頗知其事恐連逮黨
與並殺之宣帝即位以后為文皇后陳亡入隋大業初

自長安歸于江南頃之卒后兄欽襲爵建城侯位尚書
左僕射欽素無伎能奉己而已卒謚曰成子觀嗣頗有
學識官至御史中丞

廢帝王皇后琅邪臨沂人天嘉元年為皇太子妃廢帝
即位立為皇后廢帝為臨海王后廢為妃至德中薨后
生臨海嗣王至澤至澤光大元年為皇太子大建元年
襲封臨海嗣王陳亡入長安后父固自有傳

宣柳皇后諱敬言河東解縣人也曾祖世隆祖暉父偃

並有傳后九歲幹理家事有若成人侯景之亂后與弟
盼在江陵依梁元帝帝以長城公主故待遇甚厚以配
宣帝承聖二年后生後主於江陵及魏尅江陵宣帝遷
于關右后與後主俱留穰城天嘉二年與後主還朝后
為安城王妃宣帝即位立為皇后后美姿容身長七尺
二寸手垂過膝初宣帝居鄉里先娶吳興錢氏及即位
拜為貴妃甚有寵后傾心下之每尚方供奉物其上者
皆推於貴妃而已御其次焉宣帝崩始興王叔陵為亂

後主賴后與吳媪救而獲免後主即位尊后為皇太后
宮曰弘範是時新失淮南地隋師臨江又國遭大喪後
主患創不能聽政其誅叔陵供大行喪事邊境防守及
百司衆務雖假後主之敕實皆決之于后後主創愈乃
歸政焉后性謙謹未嘗以宗族為請雖衣食亦無所分
遺陳亡入長安隋大業十二年薨于東都年八十三葬
于洛陽之芒山

後主沈皇后諱婺華吳興武康人儀同三司蔡侯君理

之女也君理自有傳母即武帝女會稽穆公主早亡后尚幼而毀瘠過甚及服畢每歲時常獨坐涕泣哀動左右內外敬異焉太建三年拜為皇太子妃後主即位立為皇后后性端靜有識量寡嗜慾聰敏彊記涉獵經史工書翰後主在東宮而后父君理卒居憂處別殿哀毀逾禮後主遇后既薄而張貴妃有寵總後宮之政后澹然未嘗有所忌怨而居處儉約無錦繡之飾左右近侍纔百許人唯尋閱圖史及釋典為事嘗遇歲旱自暴而

誦佛經應時雨降無子養孫姬子允為巳子數上書諫
爭後主將廢之而立張貴妃會國亡不果乃與後主俱
入長安及後主薨后自為哀辭文甚酸切隋煬帝每巡
幸常令從駕及煬帝為宇文化及所害后自廣陵過江
還鄉里不知所終或言過江於毗陵天靜寺為尼名觀
音貞觀初卒張貴妃名麗華兵家女也家貧父兄以織
席為業後主為太子以選入宮時龔貴嬪為良娣貴妃
年十歲為之給使後主見而悅之因得幸遂有娠生太

子深後主即位拜為貴妃甚被寵遇後主與賓客游宴
貴妃薦諸宮女預焉後宮咸德之競言其善由是愛傾
後宮又工厭魅之術假鬼道以惑後主置淫祀於宮中
聚諸女巫使之鼓舞因參訪外事人間有一言一事妃
必先知之以白後主後主由此益重之故內外宗族多
被引用大臣報政亦從風而靡及隋軍克臺城妃與後
主俱入于井隋軍出之晉王廣命斬妃於青溪中橋史
臣侍中鄭國公魏徵考覽記書參詳故老云後主初即

位以始興王叔陵之亂被傷卧于承香閣下時諸姬並不得進唯張貴妃侍焉而柳太后猶居柏梁殿即皇后之正殿也沈皇后素無寵不得侍疾別居求賢殿至德二年乃於光昭殿前起臨春結綺望仙三閣閣高數十丈並數十間其牕牖壁帶懸楣欄檻之類並以沈檀香木為之又飾以金玉間以珠翠外施珠簾內有寶牀寶帳其服玩之屬瑰竒珍麗皆近古未有每微風暫至香聞數里朝日初照光映後庭其下積石為山引水為池

植以奇樹雜以花藥後主自居臨春閣張貴妃居結綺閣龔孔二貴嬪居望仙閣並複道交相往來又有王季二美人張薛二淑媛袁昭儀何婕妤江脩容等七人並有寵遞代以遊其上以宮人有文學者袁大捨等為女學士後主每引賓客對貴妃等遊宴則使諸貴人及女學士與狎客共賦新詩互相贈答採其尤豔麗者以為曲調被以新聲選宮女有容色者以千百數令習而歌之分部迭進持以相樂其曲有玉樹後庭花臨春樂等

其略曰璧月夜夜滿瓊枝朝朝新大指所歸皆美張貴妃孔貴嬪之容色張貴妃髮長七尺鬢黑如漆其光可鑒特聰慧有神彩進止閑雅容色端麗每瞻視眄睐光彩溢目照映左右嘗於閣上靚粧臨于軒檻宮中遙望飄若神仙又才辯彊記善候人主顏色是時後主怠於政事百司啟奏並因宦者蔡脫兒李善度進請後主倚隱囊置張貴妃於膝上共決之李蔡所不能記者貴妃並為疏條無所遺脫由是益加寵異後庭之家不遵法

度有結於理者但求恩於貴妃貴妃則令李蔡先啟其事而後從容為言之大臣有不從者因而譖之言無不聽於是張孔之權薰灼四方閭宦便佞之徒內外交結轉相引進賄賂公行賞罰無常綱紀替亂矣

後魏

自典午氏南遷下逮宋齊梁陳六宮制度前史言之審矣魏氏王業之兆雖基於神元而其時朝章國典百不一具故自昭成以前未有及內職之事章平思昭穆惠

煬烈傳禪八君妃后無聞焉及道武建國始追尊祖妣
皆從帝謚為皇后爰立中宮以配宸極中宮而下或稱
夫人其員數多寡悉無準限然粗有品秩可以銓次太
武統寓國家殷盛稍增左右昭儀及貴人椒房等自是
後庭漸已充實矣又魏世故事將立皇后必令手鑄金
人以成者為吉不則不得立也又太武文成保母劬勞
之恩並極尊崇之義雖事乖典禮而觀過知仁孝文改
定內官左右昭儀位視大司馬三夫人視三公三嬪視

三卿六嬪視六卿世婦視中大夫御女視元士後置女
職以典內司視尚書令僕作司太監女侍中三官視二
品監女尚書美人女史女賢人女書史書女小書女五
官視三品中才人供人中使女生才人恭信宮人視四
品青衣女酒女饗女食奚宮女奴視五品及齊神武文
襄俱未踐尊極神武嫡妻稱妃其所聘茹茹女稱為茹
茹公主文襄既尚魏朝公主故無別號兩宮自餘姬侍
並稱娘而已文宣後庭雖有夫人嬪御之稱然未具員

數孝昭內職甚少唯楊嬪才貌兼美復是貴家襄城王
母桑氏有德行並蒙恩禮其餘無所述河清新令內命
婦依古制有三夫人九嬪二十七世婦八十一御女又
準漢制置昭儀有左右二人比丞相其弘德正德崇德
為三夫人比三公光猷昭訓隆徽為上嬪比三卿宣徽
凝暉宣明順華凝華光訓為下嬪比六卿正華令則修
訓曜儀明淑芳華敬婉昭華光正昭寧貞範弘徽和德
弘猷茂光明信靜訓曜德廣訓暉範敬訓芳猷婉華明

範豔儀暉則敬信為二十七世婦比從三品穆光茂德
貞懿曜光貞凝光範令儀內範穆閏婉德明婉豔婉妙
範德暉章敬茂靜肅章穆華慎儀妙儀明懿崇明麗則
婉儀彭修閑修靜弘明慎豔光猗容徽淑秀儀芳婉貞
慎明豔穆容修範肅容茂儀英淑弘豔正信凝婉英範
懷順修媛良則瑤章訓成潤儀寧訓淑懿柔則穆儀修
禮昭慎貞媛肅閏敬順柔華昭順敬寧明訓弘儀崇敬
修敬承閑昭容麗儀閑華思柔媛光懷德良媛淑猗茂

範良信豔華徽娥肅儀妙則為八十一御女比正四品
武成好內並具其員自外又置才人采女以為散號後
主既立二后昭儀以下皆倍其數又置左右娥英比左
右丞相降昭儀比二大夫尋又置淑妃一人比相國周
氏率由姬制內職有序文帝創基修祗席以儉約武皇
嗣歷節情欲於矯枉宮闈有貫魚之美戚里無私溺之
尤可謂得君人之體也宣皇外行其志內逞其欲溪壑
難滿采擇無厭恩之所加莫限廝阜榮之所及無隔險

設於是升蘭殿以正位踐椒庭而齊體者非一人焉階
房帷而拖青紫緣恩幸而擁玉帛非一族焉雖辛癸之

荒淫趙李之傾惑曾未足比其髣髴也人厭苛政弊事
實多文帝之祀忽諸特由於此隋文思革前弊大矯其
違唯后當室傍無私寵婦官位號未詳備焉開皇二年
著內官之式略依周禮省減其數嬪三員掌教四德視
正三品世婦九員掌賓客祭祀視正五品女御三十八
員掌女功絲枲視正七品又采漢晉舊儀置六尚六司

六典遞相統攝以掌宮掖之政一曰尚宮掌導引皇后及閨閣稟賜管司令三人掌圖籍法式糾察宣奏典琮三人掌琮璽器玩二曰尚儀掌禮儀教學管司樂三人掌音律之事典贊三人掌導引內外命婦朝見三曰尚服掌服章寶藏管司飾三人掌簪珥花嚴典櫛三人掌巾櫛膏沐四曰尚食掌進膳先嘗管司醫三人掌方藥卜筮典器三人掌罇彝器皿五曰尚寢掌帷帳牀褥管司筵三人掌鋪設灑埽典執三人掌扇傘燈燭六曰尚

工掌營造百役管司製三人掌衣服裁縫典會三人掌財帛出入六尚各三員視從九品六司視勲品六典視流外二品初文獻皇后功參歷試外預朝政內擅宮闈懷嫉妬之心虛嬪妾之位不設三妃防其上逼自嬪以下置六十員加又抑損服章降其品秩至文獻崩後始置貴人三員增嬪至九員世婦二十七員御女八十一員貴人等關掌宮闈之務六尚以下皆分隸焉煬帝時后妃嬪御無釐婦職唯端容麗飾陪從宴遊而已帝又

參詳典故自製嘉名著之於令貴妃淑妃德妃是為三
夫人品正第一順儀順容順華修儀修容修華充儀充
容充華是為九嬪品正第二婕妤一十二員品正第三
美人才人一十五員品正第四是為世婦寶林二十四
員品正第五御女二十四員品正第六采女三十七員
品正第七是為女御總一百二十以敘於宴寢又有承
衣刀人皆趨侍左右並無員數視六品以下時又增置
女官準尚書省以六局管二十四司一曰尚宮局管司

言掌宣傳奏啟司簿掌名錄計度司正掌格式推罰司

闡掌門閤管籥二曰尚儀局管司籍掌經史教學紙筆

几案司樂掌音律司賓掌賓客司贊掌禮儀贊相導引

三曰尚服局管司璽掌琮璽符節司衣掌衣服司飾掌

湯沐巾櫛玩弄司仗掌仗衛戎器四曰尚食局管司膳

掌膳羞司醞掌酒醴醢醢司藥掌醫巫藥劑司饒掌廩

餼柴炭五曰尚寢局管司設掌牀席帷帳鋪設灑埽司

輿掌輿輦傘扇執持羽儀司苑掌園蘓種植蔬菜瓜果

司燈掌火燭六曰尚工局管司製掌營造裁縫司寶掌
金玉珠璣錢貨司綵掌繒帛司織掌織染六尚二十二
司員各二人唯司樂司膳員各四人每司又置典及掌
以貳其職六尚十人品從第五司二十八人品從第六
典二十八人品從第七掌二十八人品從第九女史流
外量局閑劇多者十人以下無定員數聯事分職各有
司存焉

神元皇后竇氏沒鹿回部大人賓之女也賓臨終誡其

二子速侯回題令善事帝及賓卒速侯等欲因帝會喪
為變語泄帝聞之晨起以佩刀殺后馳使告速侯等言
后暴崩速侯等來赴因執殺之

文帝皇后封氏生桓穆二帝早崩桓帝立乃葬焉文成
初穿天泉池獲一石銘稱桓帝葬母氏遠近赴會二十
餘萬有司以聞命藏之太廟次妃蘭氏是生思帝

桓皇后惟氏生三子長曰普根次惠帝次煬帝平文崩
后攝國事時人謂之曰女國后性猛忌平文之崩后所

為也

平文皇后王氏廣寧人也年十三因事入宮得幸於平
文生昭成帝平文崩昭成在襁褓時國有內難將害帝
子后匿帝於袴中咒曰若天祚未終者汝無聲遂良久
不啼得免於難昭成初欲定都於灑源川築城郭起宮
室議不決后聞之曰國自上世遷徙為業今事難之後
基業未固若郭而居一旦寇來難卒遷動乃止烈帝之
崩國祚殆危興復大業后之力也崩葬雲中金陵道武

即位配饗太廟

昭成皇后慕容氏慕容皝之女也初帝納皝妹為妃未幾而崩皝復請繼好遣大人長孫秩逆后皝送于境上后至有寵生獻明帝及秦明王后性聰敏多智專夕理內每事多從初昭成遣衛辰兄悉勿祈還部落也后誠之曰汝還必深防衛辰辰姦猾終當滅汝悉勿祈死其子果為衛辰所殺卒如后言建國二十三年崩道武即位配饗太廟

獻明皇后賀氏東部大人野干女也少以容儀選入東宮生道武苻洛之內侮也后與道武及故臣吏避難北徙俄而高車來抄掠后乘車避賊而南中路失道乃仰天曰國家允胄豈正爾絕滅也惟神靈扶助遂馳輪正不傾行百餘里至七个山南而免難後劉顯使人將害帝帝姑為顯弟亢涅妻知之密以告后梁眷亦來告難后乃令帝去之后夜飲顯醉向晨故驚廐中羣馬使起視馬后泣謂曰吾諸子始皆在此今盡亡矣汝等誰殺

之故顯使不急追道武得至賀蘭部羣情未甚歸附后
從弟外朝大人悅舉部隨從供奉盡禮顯怒將害后后
奔亢泥家匿神車三日亢泥舉室請救乃得免會劉顯
部亂始得亡歸後后弟染干忌道武之得人心舉兵圍
逼行宮后出謂染干曰汝等今安所置我而欲殺吾子
也染干慙而去後后少子秦王觚使于燕慕容垂止之
后以觚不反憂念寢疾皇始元年崩祔葬于盛樂金陵
後追加尊謚配饗焉

道武皇后慕容氏寶之季女也中山平人充掖庭得幸左丞相衛王儀等奏請立皇后帝從儀令后鑄金人成乃立之封后母孟為溧陽君後崩

道武宣穆皇后劉氏劉眷女也登國初納為夫人生華陰公主後生明元后專理內事寵待有加以鑄金人不成故不登后位魏故事後宮產子將為儲貳其母皆賜死道武末年后以舊法薨明元即位追尊謚位配饗太廟自此後宮人為帝母皆正配饗焉

明元昭哀皇后姚氏姚興女西平長公主也明元以后
納之後為夫人后以鑄金人不成未升尊位然帝寵禮
如后是後猶欲正位后謙不當泰恒五年薨帝追恨之
贈皇后璽綬而加謚焉葬雲中金陵

明元密皇后杜氏魏郡鄴人陽平王超之妹也初以良
家子選入太子宫有寵生太武及明元即位拜貴嬪泰
恒五年薨贈貴嬪葬雲中金陵太武即位追尊號謚配
饗太廟又立廟于鄴刺史四時薦祀以魏郡太后所生

之邑復其調役後甘露降于廟庭文成時相州刺史高閭表修后廟詔曰婦人外成理無獨祀陰必配陽以成天地未聞有莘之國立太妣之饗此乃先皇所立一時之至感非經世之遠制便可罷祀先是太武保母竇氏初以夫家坐事誅與二女俱入宮操行純備進退以禮明元命為太武保母性仁慈帝感其恩訓奉養不異所生及即位尊為皇太后封其弟漏頭為遼東王太后訓釐內外甚有聲稱性恬素寡欲喜怒不形於色好揚人

之善隱人之過帝征涼州蠕蠕入寇太后命諸將擊走之太平真君元年崩詔天下大臨三日太保盧魯元監護喪事謚曰惠葬崞山從后意也初后嘗登崞山顧謂左右曰吾母養帝躬敬神而愛人若死而不滅必不為賤鬼然於先朝本無位次不可違禮以從園陵此山上可以終託吾葬焉別立后寢廟於崞山建碑頌德太武皇后赫連氏屈丐女也太武平統萬納后及二妹俱為貴人後立為皇后文成初崩祔葬金陵

太武敬哀皇后賀氏代人也初為夫人生景穆皇帝神
廡元年薨追贈貴嬪葬雲中金陵後追號尊諡配饗太
廟

景穆恭皇后郁久閭氏河東王毗妹也少以才選入東
宮有寵生文成皇帝而薨文成即位追尊號諡葬雲中
金陵配饗太廟又文成乳母本遼西人因事入宮乳帝
有劬勞保護之功文成即位尊為保太后尋為皇太后
告於郊廟和平元年崩詔天下大臨三日諡曰昭葬於

廣寧磨笄山俗謂之雞鳴山太后遺志也依惠太后故事別立寢廟置守陵二百家樹碑頌德

臣謹按以乳母而為皇太后行郊廟禮神其聽之乎稱崩而使天下臨之人其哀之乎

文成文明馮皇后長樂信都人也父朗秦雍二州刺史西城郡公母樂浪王氏后生於長安有神光之異朗坐事誅后遂入宮太武左昭儀后之姑也雅有母德撫養教訓年十四文成踐極以選為貴人後立為皇后文成

崩故事國有大喪三日之後御服器物一以燒焚百官及中宮皆號泣而臨之后悲叫自投火中左右救之良久乃蘇獻文即位尊為皇太后丞相乙渾謀逆獻文年十三居于諒闇太后密定大計誅渾遂臨朝聽政及孝文生太后躬親撫養是後罷令不聽政事太后行不正內寵李奕獻文因事誅之太后不得意獻文暴崩時言太后為之也承明元年尊曰太皇太后復臨朝聽政后性聰達自入宮拔粗學書計及登尊極省決萬機孝文

詔諸鷙鳥傷生之類宜放之山林乃罷鷹師曹以其地
為太后立報德佛寺太后與孝文遊於方山顧瞻川阜
有終焉之志因謂羣臣曰舜葬蒼梧二妃不從豈必遠
祔山陵然後為貴哉吾百歲之後神其安此孝文乃詔
有司營建壽陵於方山又起永固石室將為清廟焉太
和五年起作八年而成刊石立碑頌太后功德太后以
帝富於春秋乃作勸戒歌三百餘章又作皇誥十八篇
太后性儉素不好華飾躬御縵繒而已宰人上膳案裁

徑尺羞餽滋味十分減八太后嘗以體不安服菴間子
宰人昏而進粥有蠅蜒在馬后舉匕得之帝時侍側將
加殛罰太后笑而釋之自太后臨朝專政帝雅性孝謹
不欲參決事無巨細一稟於太后太后多智猜忌能行
大事生殺賞罰決於俄頃多有不關帝者是以威福兼
作震動內外故杞道德王遇張祐苻承祖等拔自微閭
歲中而至王公王叡出入卧內數年之間便為宰輔賞
賚千萬億計金書鐵券許以不死之詔李沖以器能受

任亦由見寵帷幄密加賞賚不可勝數太后性嚴明假有寵侍亦無所縱左右纖介之愆動加捶楚然性不宿憾尋亦待之如初或因此更加富貴是以人人懷於利欲至死而不思退太后曾與孝文幸靈泉池宴羣臣及蕃國使人諸方渠帥各令為其方舞帝上壽太后忻然作歌帝亦和歌遂命羣臣各言其志於是和歌者凡九十人太后外禮人望元丕游明根等頒賜金帛輿馬每至褒美獻等皆引丕參之以示無私又自以過失懼人

議已小有疑忌便見誅戮迄后之崩孝文不知所生至如李訢李惠之徒猜嫌覆滅者十餘家死者數百人率多枉濫天下冤之十四年崩於太和殿時年四十九其日有雄雉集于太華殿帝勺飲不入口五日謚曰文明太皇太后葬於永固陵帝毀瘠絕酒肉不內御者三年乃於永固陵東北里餘營壽宮遂有終焉瞻望之志及遷洛邑乃自表瀍西以為山園之所而方山虛宮號曰萬年堂云

文成元皇后李氏梁國蒙縣人母頓丘王峻之妹也后
之生也有異於常父方叔恒言此女當大貴及長資質
美麗太武南征命永昌王仁出壽春軍至后宅因得后
及仁鎮長安遇事誅后與其家人送平城宮高祖登白
樓望見美之乃下臺后得幸於齊庫中遂有娠常太后
後問后知之時守庫者亦私書於壁記之別加驗問皆
符同及生獻文拜貴人太安二年太后令依故事令后
具條記在南兄弟及引所結宗兄洪之悉以付託臨決

每一稱兄弟拊膺慟哭遂薨後謚曰元皇后葬金陵配
饗太廟

獻文思皇后李氏中山安喜人南郡王惠之女也姿德
婉淑年十八以選入東宮獻文即位為夫人生孝文帝
皇興三年薨葬金陵承明元年追崇號謚配饗太廟

孝文貞皇后林氏平涼人也父勝位平涼太守叔父金
閭起自閹宦獻文初為定州刺史為乙弗渾所誅及勝
兄弟皆死勝無子有二女入掖庭后容色美麗得幸於

孝文生皇子恂以恂將為儲貳太和七年后依舊制薨
帝仁恕不欲襲前事而稟文明太后意故不果行謚曰
貞皇后葬金陵及恂以罪賜死有司奏追廢后為庶人
孝文廢皇后馮氏太師熙之女也太和十七年孝文既
終喪太尉元丕等表以長秋未建六宮無主請正內位
孝文從之立后為皇后恩遇甚厚孝文後重引后姊昭
儀至洛稍有寵后禮愛漸衰昭儀自以年長且前入宮
掖素見待念輕后而不率妾禮后雖性不妬忌時有愧

恨之色昭儀規為內主譖構百端尋廢后為庶人后貞謹有德操遂為練行尼後終於瑤光佛寺

孝文幽皇后亦馮熙女母曰常氏本微賤得幸於熙熙元妃公主薨後遂主家事生后與北平公夙文明太皇太后欲家世貴寵乃簡熙二女俱入掖庭時年十四其一早卒后有姿媚偏見愛幸未幾疾病太后乃遣還家為尼帝猶留意焉歲餘而太后崩帝服終頗存訪之又聞后素疹痊除遣閹宦雙三念璽書勞問之遂迎赴洛

陽宮及至寵愛過本初當夕宮人稀復進見拜為左昭儀後立為皇后帝頻歲南征后遂與中官高菩薩私亂及帝在汝南不豫后便公然醜恣中常侍雙蒙等為其心腹是時彭城公主宋王劉昶子婦也年少廢居北平公馮夙后之同母弟也后求婚於孝文孝文許之公主志不願后欲彊之婚有日矣公主密與侍婢及僮從十餘人乘輕車冒霖雨赴懸瓠奉謁孝文自陳本意因言后與菩薩亂狀帝聞因駭愕未之信而祕匿之此後后

漸憂懼與母常氏求託女巫禱厭孝文疾不起一旦得如文明太后輔少主稱命者賞報不貲又取三牲宮中祆祠假言祈福專為左道母常或自詣宮中或遣侍婢與相報答帝至洛執問菩薩雙蒙等具得情狀帝以疾卧含溫室夜引后并列菩薩等於戶外后臨入令搜衣中稱有寸刃便斬后頓首泣謝乃賜坐東楹去御筵二丈餘孝文令菩薩等陳狀又讓后曰汝有祆術可具言之后乞屏左右有所密狀孝文勅中常侍悉出唯令長

秋卿白整在側取衛直刀拄之后猶不言孝文乃以綿
堅塞整耳自小語再三呼整無所應乃令后言事隱人
莫知之孝文乃喚彭城北海二王令入坐言昔是汝嫂
今便他人但入勿避又曰此老嫗欲白刃插我肋上可
窮問本末勿有所難又云馮家女不能復相廢逐且使
在宮中空坐有心乃能自死汝等勿謂吾猶有情也帝
素至孝猶以文明太后故未行廢二王出乃賜后辭死
訣再拜稽首涕泣及入宮後帝命中官有問於后后罵

曰我天子婦當面對豈令汝傳也帝怒勅后母常入示與后狀常撻之百餘乃止帝尋南伐后留京師雖以罪失寵而夫人嬪妾奉之如法唯令太子在東宮無朝謁之事帝疾甚謂彭城王勰曰後宮久乖陰德自絕於天吾死後可賜自盡別宮葬以后禮庶掩馮門之大過帝崩梓宮達魯陽乃行遺詔命北海王詳奉宣遺旨長秋卿白整等入授后藥后走呼不肯引決曰官豈有此也此是諸王輩殺我耳整等執持彊之乃含椒而盡梓宮

次洛南咸陽王禧等知審死相視曰若無遺詔我兄弟亦當作計去之豈可令失行婦人宰制天下殺我輩也謚曰幽皇后葬長陵瑩內

孝文文昭皇后高氏司徒公肇之妹也父颺母蓋氏凡四男三女皆生於東裔孝文初乃舉室西歸近龍城鎮鎮表后德色婉艷及至文明太后親幸北部曹見后竒之入掖庭時年十三初后幼曾夢在堂內立而日光自窻中照之灼灼而熱后東西避之光猶斜照不已如是

數夕怪之以白其父颺颺以問遼東人閔宗宗曰此竒徵也昔有夢日入懷猶生天子况日照之徵此女將被帝命誕育人君之象也後生宣武及廣平王懷樂安公主馮昭儀寵盛密有母養帝心后自代如洛陽暴薨於汲郡之共縣或云昭儀所賊也宣武之為皇太子二日一朝幽后后拊念慈愛有加孝文出征宣武入朝必久留后宫親視櫛沐母道隆備其後有司請加尊謚曰文昭貴人孝文從之宣武踐阼追尊配饗后先葬在長陵

東南陵制卑狹乃改營山陵號終寧陵置邑戶五百家
明帝時更上尊號太后以同漢晉之典正姑婦之禮廟
號如舊文昭遷靈櫬於長陵北內西北六十步初開終
寧陵數丈於梓宮上獲大蛇長丈餘黑色頭有王字蟄
而不動靈櫬既遷還置蛇舊處

宣武順皇后于氏太尉烈弟勁之女也宣武始親政事
烈時為領軍總心膂之任以嬪御未備左右諷諭稱后
有容德帝乃迎入為貴人時年十四甚見寵愛立為皇

后后靜默寬容性不妬忌生皇子三歲夭没其後暴崩
宮禁事祕莫能知悉者世議歸咎于高夫人葬永泰陵
謚曰順皇后

宣武皇后高氏文昭皇后弟優之女也宣武納為貴嬪
生皇子早夭又生建德公主後拜為皇后甚見禮重性
妬忌宮人希得進御及明帝即位上尊號曰皇太后尋
為尼居瑤光寺非大節慶不入宮中建德公主始五六
歲靈太后出覲母武邑君時天文有變靈太后欲以當

禍是夜暴崩天下寃之喪還瑤光佛寺殯皆以尼禮初
孝文幽后之寵也欲專其愛後宮接御多見阻遏孝文
時言于近臣稱婦人妬防雖王者亦不能免况士庶乎
宣武高后悍忌嬪御有至帝崩不蒙待接者由是在洛
二十餘年皇子全者唯明帝而已

宣武靈皇后胡氏安定臨涇人司徒國珍女也母皇甫
氏產后之日赤光四照京兆山北縣有趙胡者善於卜
相國珍問之胡云賢女有大貴之表當為天下母生勿

過三人知也后姑為尼頗能講道宣武初入講禁中諷
左右言后有姿行帝聞之乃召入掖庭為充華世婦而
椒庭之中以國舊制相與祈祝皆願生諸王公主不願
生太子唯后獨曰豈畏一身之死而令皇家不育家嫡
也及明帝在孕同列猶以故事相恐勸為他計后故意
確然幽夜獨誓云但使所生是男次第當長子子生身
死所不辭也既誕明帝進為充華嬪先是宣武頻喪皇
子自以春秋長矣深加慎謹為擇乳保皆取良家宜子

者養於別宮皇后及充華皆不得撫視焉及明帝踐阼尊為皇太妃尋尊為太后臨朝聽政猶曰殿下下令施事後改令稱詔羣臣上書曰陛下自稱曰朕太后以明帝沖幼未堪親祭欲依周禮夫人與君交獻之義代行祭祀禮官博議以為不可而太后欲以幃幔自鄣觀三公行事重問侍中崔光光便據漢和熹鄧太后薦祭故事太后大悅遂攝行初祀太后性聰悟多才藝略通佛經太義親覽萬機手筆斷決幸西林園法流堂命侍臣

射不能者罰之又自射針孔中之大悅賜左右布帛有
差先是太后勅造申訟車時御馬出自雲龍大司馬門
從宮西北入自千秋門以納寃訟又親策孝秀州郡計
吏於朝堂太后與明帝幸華林園宴羣臣於都亭曲水
令王公以下賦四言詩太后詩曰化光造物含氣貞明
帝詩曰恭己無為上賴慈英王公以下賜帛有差太后
父薨百寮表請公除太后不許尋幸永寧寺觀建刹於
九級之基僧尼士女赴者數萬人及改葬文昭高后太

后不欲令明帝主事乃自為喪主出至終寧陵親奠遣
事還哭於太極殿至於訖事皆自主焉後幸左藏王公
嬪主從者百餘人皆令任力負布絹即以賜之陳留公
李崇章武王融並以所負過多顛仆於地語在李崇傳
又幸嵩高山夫人九嬪公主以下從者數百人升于頂
中廢諸淫祀特敬天神不在其例尋幸關口溫水登雞
頭山自射象牙簪一發中之勅示文武時太后得志逼
幸清河王懌淫亂肆情為天下所惡領軍元乂長秋卿

劉騰等奉明帝於顯陽殿幽太后於北宮於禁中殺懌
其後太后從子都統僧敬與備身左右張車渠等數十
人謀殺義復奉太后臨朝事不克僧敬坐徙邊車渠等
死胡氏多免黜後明帝朝太后於西林園宴文武侍臣
飲至日夕義乃起至太后前自陳外云太后欲害已及
騰太后答云無此語遂至于極昏太后欲攜帝宿宣光
殿言母子不相聚久今暮欲共一宿羣臣不可左衛將
軍奚康生曰至尊陛下之兒隨陛下可也太后自起援

帝下堂去帝前入閤左右競相排閤不得閉康生奪千
牛刀斫之乃得定帝既升宣光殿康生乘酒勢將出處
分殺義為義所執光祿勳賈粲給太后曰侍官懷恐不
安陛下宜親安慰太后適下殿粲即扶帝出東序前御
顯陽殿還閉太后於宣光殿義遂殺康生後劉騰死義
又寬怠太后與明帝及高陽王雍為計解義領軍太后
復臨朝大赦改元自是朝政疏緩威恩不立天下牧守
所在貪恠鄭儼汙亂宮掖勢傾海內李神軌徐紀等並

見親侍一二年中位總禁要手握王爵輕重在心宣淫于朝為天下所穢文武解體所在亂逆土崩魚爛由於此矣太后自以失德懼為宗室所嫌僧敬又因聚集宗族遂泣涕諫曰陛下母儀海內豈宜輕脫如此太后大怒自是不召僧敬內為朋黨防蔽耳目明帝所親幸者太后多以事害焉有密多道人能胡語帝置於左右太后慮其傳致消息三月三日於城南大巷中殺之方懸賞募賊又於禁中殺領左右鴻臚少卿谷會紹達並帝

所親也母子之間嫌隙屢起鄭儼慮禍乃與太后計因
潘充華生女太后乃詐以為男便大赦為武泰元年復
陰行鳩毒其年二月明帝暴崩乃奉潘嬪女言太子即
位經數日見人心已安始言潘嬪本實生女今宜更擇
嗣君遂立臨洮王子釗為帝年始二三歲於是朝野憤
歎及爾朱榮稱兵渡河太后盡召明帝六宮皆令入道
太后亦自落髮榮遣騎拘送太后及幼主於河陰太后
對榮多所陳說榮拂衣而起太后及幼主並沈於河太

后妹馮翊君收瘞於雙靈寺孝武時始葬以后禮而追謚曰靈

孝明皇后胡氏靈太后從兄冀州刺史盛之女靈太后欲榮重門族故立為皇后明帝頗狂酒德專嬖充華潘氏后及嬪御並無過寵太后為帝選納抑屈人流時博陵崔孝芬范陽盧道約隴西李瓚等女俱為世婦人有訴訟咸見忿責武泰初后既入道遂居於瑤光寺

孝武皇后高氏齊神武之長女也帝見立乃納為后及

帝西幸關中降為彭城王韶妃

文帝文皇后乙弗氏洛陽人也其先世為吐谷渾渠帥居青海號青海王涼州平后之高祖莫瓌擁部落入附拜定州刺史封西平公自莫瓌後三世尚公主女乃多為王妃父瑗儀同三司兗州刺史母淮陽長公主孝文之第四女也后美容儀少言笑年十六文帝納為妃及帝即位以大統元年冊為皇后后性好節儉蔬食故衣珠玉羅綺絕於服玩又仁恕不為嫉妬之心帝益重之

生男女十二人多夭折唯太子及武都王戊存焉時新都關中務欲東討蠕蠕寇邊未遑北伐故帝結婚以撫之於是更納悼后命后遜居別宮出家為尼悼后猶懷猜忌復徙后居秦州依子秦州刺史武都王帝雖限大計恩好不忘後密令養髮有追還之意然事祕禁外無知者六年春蠕蠕舉國度河頗有言虜為悼后之故興此役帝曰豈有百萬之衆為一女子舉也雖然致此物論朕亦何顏以見將帥邪乃遣中常侍曹寵賁手勅令

后自盡后奉勅揮淚謂寵曰願至尊享千萬歲天下康
寧死無恨也因命武都王前與之決遺語皇太子辭皆
悽愴因慟哭久之侍御莫能仰視召僧設供令侍婢數
十人出家手為落髮事畢乃入室引被自覆而崩年三
十一鑿麥積崖為龕而葬神柩將入有二叢雲先入龕
中頃之一滅一出後號寂陵及文帝山陵畢手書云萬
歲後欲令后配饗公卿乃議追謚曰文皇后祔於太廟
廢帝時合葬於永陵

文帝悼皇后郁久閭氏蠕蠕主阿那瓌之長女也容貌
嚴夙有神智大統初蠕蠕屢犯北邊文帝乃與約通好
結婚扶風王孚受使奉迎蠕蠕俗以東為貴后之來營
幕戶席一皆東向車七百乘馬萬匹馳千頭到黑鹽池
魏朝鹵薄文物始至孚奏請正南面后曰我未見魏主
故蠕蠕女也魏仗向南我自東面孚無以辭四年正月
至京師立為皇后時年十四六年後懷孕將產居於瑤
華殿聞上有狗吠聲心甚惡之又見婦人盛飾來至后

所后謂左右此為何人醫巫傍侍悉無見者時以為文
后之靈產訖而崩年十六葬於少陵原十七年合葬永
陵當會橫橋北后梓宮先至鹿苑帝輶輦後來將就次
所軸折不進

廢帝皇后宇文氏周文帝女也后初產之日有雲氣滿
室芬氲久之幼有風神好陳列女圖置之左右周文曰
每見此女良慰人意廢帝之為太子納為妃及即位立
為皇后志操明秀帝深重之專寵後宮不置嬪御帝既

廢崩后亦以忠於魏室罹禍

恭帝皇后若干氏司空長樂正公惠之女也有容色恭帝納之為妃及即位立為皇后後出家為尼在佛寺薨竟無諡

孝靜皇后高氏齊神武之第二女也天平四年詔聘以為皇后神武前後固辭帝不許興和初詔司徒孫騰司空襄城王昶等奉詔致禮以后駕迎於晉陽之丞相第五月立為皇后大赦齊受禪降為中山王妃後降于尚

書左僕射楊遵彥

北齊

武明皇后婁氏諱昭君贈司徒內干之女也少明悟彊族多聘之並不肯行及見神武城上執役驚曰此真吾夫也乃使婢通意又數致私財使以聘己父母不得已而許焉神武既有澄清之志傾產以結英豪密謀祕策后嘗參預之及拜勃海王妃閩闈之事悉決焉后高明嚴斷雅遵儉約往來外舍侍從不過十人性寬厚不妬

忌神武姬侍咸加恩待神武嘗將西討出師后夜變生
一男一女左右以危急請追告神武后弗聽曰王出統
大兵何得以我故輕離軍幕死生命也來復何為神武
聞之嗟嘆良久沙苑敗後侯景屢言請精騎二萬必能
取黑獺神武悅以告后后曰若如其言豈有還理得獺
失景亦有何利乃止神武逼於蠕蠕欲娶其女而未決
后曰國家大計願不疑也及蠕蠕公主至后避正室處
之神武愧而拜謝焉曰彼將有覺願絕勿顧慈愛諸子

不異己出躬自紡績人賜一袍一袴手縫戎服以帥左右弟昭以功名自達其餘親屬未嘗為請爵位每言有材當用義不以私亂公文襄嗣位進為太妃文宣將受魏禪后責之云汝父如龍汝兄如虎皆以帝王之重不敢妄據云何一朝欲輒行舜禹之事彼是何人汝欲擬之帝所以中止天保初尊為皇太后宮曰宣訓濟南即位尊為太皇太后尚書楊愔等受遺詔輔政踈忌諸王太皇太后密與孝昭及諸大將定策誅之下令廢立孝

昭即位復為皇太后孝昭崩太后又下詔立武成帝大
寧二年春太后寢疾衣忽自舉用巫媪言改姓石氏四
月辛丑崩於北宮時年六十二五月甲申合葬義平陵
太后凡孕六男二女皆感夢孕文襄則夢一斷龍孕文
宣則夢大龍首尾屬天地張口動目勢狀驚人孕孝昭
則夢蠕龍於地孕武成則夢龍浴於海孕魏二后並夢
月入懷孕襄城博陵二王夢鼠入衣下后未崩有童謠
曰九龍母死不作孝及后崩武成不改服緋袍如故未

幾登三臺置酒作樂宮女進白袍帝怒投諸臺下和士
開請止樂帝大怒撻之帝於昆季次實九蓋其徵驗也
蠕蠕公主者蠕蠕主郁久閭阿那瓌女也蠕蠕彊盛與
西魏通和欲連兵東伐神武病之令杜弼使蠕蠕為世
子求婚阿那瓌曰高王自娶則可神武猶豫尉景與武
明皇后及文襄並勸請乃從之武定三年使慕容儼往
聘之號曰蠕蠕公主八月神武迎於下館阿那瓌使其
弟秃突佳來送女且報聘仍戒曰待見外孫然後返國

公主性嚴毅一生不肯華言神武嘗有病不得往公主所禿突佳怨恚神武自射堂輿疾就公主其見將護如此神武崩文襄從蠕蠕國法蒸公主產一女焉

彭城太妃爾朱氏榮之女魏孝莊后也神武納為別室敬重逾於婁妃見必束帶自稱下官神武迎蠕蠕公主還爾朱氏迎於木井北與蠕蠕公主前後別行不相見公主引魚弓仰射翔鷓應弦而落妃引長弓斜射飛鳥亦一發而中神武喜曰我此二婦並堪擊賊後為尼神

武為起佛寺天保初為太妃及文宣狂酒將無禮於太妃太妃不從遂遇禍小爾朱氏兆之女也初為建明皇后神武納之生任城王未幾與趙郡公琛私通徙於靈州後適范陽盧景卒

上黨太妃韓氏軌之妹也神武微時欲聘之軌母不許及神武貴韓氏夫已死乃納之

馮翊太妃鄭氏名大車嚴祖妹也初為魏廣平王妃遷鄴後神武納之寵冠後庭生馮翊王潤神武之征劉蠡

升也文襄蒸馬神武還一婢告之二婢為證神武杖文襄一百而幽之武明后亦見隔絕時彭城爾朱太妃有寵生王子洸神武將有廢立意文襄求救於司馬子如子如來朝偽為不知者請武明后神武告其故子如曰消難亦姦子如妾如此事正可覆蓋妃是王結髮婦常以父母家財奉王王在懷朔被杖背無完膚妃晝夜供給視瘡後避葛榮同走并州貧困然馬屎自作靴恩義何可忘夫婦相宜女配至尊男承大業又婁領軍勲何

宜搖動一女子如草芥况婢言可必信乎神武因使子如鞠之子如見文襄尤之曰男兒何意畏威自誣因教二婢反辭脅告者自縊乃啟神武曰果虛言神武大悅召后及文襄武明后遙見神武一步一叩頭文襄且拜且進父子夫妻相泣乃如初神武乃置酒曰全我父子者司馬子如賜之黃金百三十斤文襄贈良馬五十疋高陽太妃游氏父京之為相州刺史神武尅鄴欲納之京之不許遂牽曳取之京之尋死游氏於諸太妃中最

有德訓諸王公主婚嫁常令主之馮娘者子昂妹也初為魏任城王妃適爾朱世隆神武納之生浮陽公主李娘者延實從妹也初為魏城陽王妃又王娘生永安王浚穆娘生陽平王淹並早卒不為太妃

文襄敬皇后元氏魏孝靜帝之姊也孝武帝時封馮翊公主而歸於文襄容德兼美曲盡和敬初生河間王孝琬時文襄為世子三日而孝靜幸世子第贈錦繡及布帛萬匹世子辭求通受諸貴禮遺於是十屋皆滿次生

兩公主文宣受禪尊為文襄皇后居靜德宮及天保六年文宣漸致昏狂乃移居於高陽之宅而取其府庫曰吾兄昔姦我婦我今須報乃淫於后其高氏女婦無親疏皆使左右亂交之於前以葛為絙令魏安德主騎上使人推引之又命胡人苦辱之帝又白呈露以示羣下武平中后崩祔葬義平陵琅邪公主名玉儀魏高陽王斌庶生妹也初不見齒為孫騰妓騰又放棄文襄遇諸塗悅而納之遂被殊寵奏魏帝封焉文襄謂崔季舒曰

爾由來為我求色不如我自得一絕異者崔暹必當造直諫我亦有以待之及暹諮事文襄不假以顏色居三日暹懷刺墜之於前文襄問何用此為暹悚然曰未得通公主文襄大悅把暹臂入見焉季舒語人曰崔暹常忿吾佞在大將軍前每言叔父合殺及其自作體佞乃體過於吾玉儀同產姊靜儀先適黃門郎崔括文襄亦幸之皆封公主括父子由是超授賞賜甚厚焉

文宣皇后李氏諱祖娥趙郡李希宗女也容德甚美初

為太原公夫人及帝將建中宮高隆之高德正言漢婦人不可為天下母宜更擇美配楊愔固請依漢魏故事不改元妃而德正猶固請廢后而立段昭儀欲以結勲貴之援帝竟不從而立后焉帝好捶撻嬪御乃至有殺戮者唯后獨蒙禮敬天保十年改為可賀敦皇后孝昭即位降居昭信宮號昭信皇后武成踐阼逼后淫亂曰若不許我當殺爾兒后懼從之後有娠太原王紹德至閤下不得見愔曰兒豈不知邪姊姊腹大故不見兒后

聞之大慙由是生女不舉帝橫刀詬曰爾殺我女我何

不殺爾兒對后前築殺紹德后大哭帝愈怒裸后亂搥

撻之后號天不已盛以絹囊流血淋漓投諸渠水良久

乃蘇以犢車載送妙勝尼寺后性愛佛法因此為尼齊

亡入關隋時得還趙郡段昭儀韶妹也婚夕韶妻元氏

為俗弄女壻法戲文宣文宣銜之後因發怒謂韶曰我

會殺爾婦元氏懼匿婁太后家終文宣世不敢出昭儀

才色兼美禮遇殆同正嫡後主時改適錄尚書唐邕王

嬪者琅邪人也嬪姊先適崔修文宣並幸之數數降其夫家超用修為尚書郎薛嬪者本倡家女也年十四五時為清河王岳所好其父求內宮中大被寵嬖其姊亦俱進御文宣後知先與岳通又為其父乞司徒公帝大怒先鋸殺其姊嬪時有娠過產亦從戮

孝昭皇后元氏開府元蠻女也初為常山王妃天保末賜姓步六孤孝昭即位立為皇后帝崩從梓宮之鄴始度汾橋武成聞后有奇藥追索之不得使閹人就車頓

辱降居順成宮武成既殺樂陵王元后被閔隔不得與家相知宮闈內忽有飛語帝令檢推得后父兄書信元蠻由是坐免官后以齊亡入周氏宮中隋文帝作相放還山東

武成皇后胡氏安定胡廷之女其母范陽盧道約女初懷孕有胡僧詣門曰此宅瓠蘆中有月既而生后天保初選為長廣王妃產後主日有鴉鳴於產帳上武成崩尊為皇太后陸媪及和士開密謀殺趙郡王叡出婁定

遠高文遙為刺史和陸諂事太后無所不至初武成時
后與諸閹人褻狎武成寵幸和士開每與后握槊因此
與后姦通自武成崩後數出詣佛寺又與沙門曇獻通
布金錢於獻席下又掛寶裝胡床於獻屋壁武成平生
之所御也乃置百僧於內殿託以聽講日夜與曇獻寢
處以獻為昭元統僧徒遙指太后以弄曇獻乃至謂之
為太上者帝聞太后不謹而未之信後朝太后見二少
尼悅而召之乃男子也於是曇獻事亦發皆伏法并殺

元山王三郡君皆太后之所昵也帝自晉陽奉太后還鄴至紫陌卒遇大風兼舍人魏僧伽明風角奏言即時當有暴逆事帝詐云鄴中有急彎弓纏鞘馳入南城令鄧長顓幽太后北宮仍有勅內外諸親一不得與太后相見久之帝迎復太后太后初聞使者至大驚慮有不測每太后設食帝亦不敢嘗周使元偉來聘作述行賦敘鄭莊公克段而遷姜氏文雖不工當時深以為愧齊亡入周恣行姦穢開皇中殂

弘德夫人李氏趙郡李叔讓女也初為魏靜帝嬪武成
納焉生南陽王仁盛為太妃姊為南安王思好妃坐夫
反以燒死太妃聞之發狂而薨文宣五嬪及中人盧勒
义妹武成並以為嬪武成崩後胡后令二嬪自殺二嬪
悲哭後主為之惻愴私遺衣物令出外避焉盧生淮南
王後為太妃又有馬嬪亦得幸為后所妬自縊死彭藥
任祥並有女因坐父兄事皆入宮為文宣所幸武成以
彭為夫人生齊安王任生丹陽王並為太妃

後主皇后斛律氏左丞相光之女也初為皇太子妃後
主受禪立為皇后武平三年正月生女帝欲悅光詐稱
生男為之大赦光誅后廢在別宮後令為尼齊滅嫁為
開府元仁妻

後主皇后胡氏隴東王長仁女也胡太后失母儀之道
深以為愧欲求悅後主故飾后於東宮令帝見之帝果
悅立為弘德夫人進左昭儀大被寵愛斛律后廢陸媪
欲以穆夫人代之太后不許祖孝徵請立胡昭儀遂登

為皇后陸媪既非勸立又意在穆夫人後忽於太后前
作色言曰何物親侄女作如此語言太后問其言為何
曰不可道固問之乃曰語大家云太后行多非法不可
以訓太后大怒喚后出立剃其髮送令還家帝思見之
每致詩以通意後與斛律廢后俱召入內數日而鄴不
守後亦改嫁云

後主皇后穆氏名邪利本斛律后從婢也母名輕霄本
穆子倫婢也轉入侍中宋欽道家姦私而生后莫知氏

族或云后即欽道女也小字黃花後字舍利欽道婦妬以輕霄面黥為宋字欽道伏誅黃花因沒入宮有幸於後主宮內稱為舍利大監女侍中陸大姬知其寵養以為女薦為弘德夫人武平元年六月生皇子恒於時後主未有儲嗣陸陰結符以監撫之任不可無主時皇后斛律氏丞相光之女也慮其懷恨先令母養之立為皇太子陸以國姓之重穆陸相對又奏賜姓穆氏胡庶人之廢也陸有助焉故遂立為皇后大赦初有折衝將軍

元正烈於鄴城東水中得璽以獻文曰天皇后璽蓋石
氏所作詔書頒告以為穆氏之瑞焉武成為胡后造真
珠裙袴所費不可稱計被火所燒後主既立穆皇后復
為營之屬周武遭太后喪詔侍中薛孤康買等為弔使
又遣商胡齋錦綵三萬疋與弔使同往欲市真珠為皇
后造七寶車周人不與交易然而竟造焉先是童謠曰
黃花勢欲落清觴滿盃酌言黃花不久也後主自立穆
后以後昏飲無度故云清觴滿盃酌陸息駱提婆詔改

姓為穆陸大姬皆以皇后故也后既以陸為母提婆為家不復顧念輕霄輕霄後自療面欲求見為大姬陸媪使禁掌之竟不得見

馮淑妃名小憐大穆后從婢也穆后愛哀以五月五日進之號曰續命性慧黠能彈琵琶工歌舞後主惑之坐則同席出則並馬願得死生一處命淑妃處隆基堂淑妃惡曹昭儀所嘗居也悉令反換其地周師之取平陽帝獵於三堆晉州亟告急帝將還淑妃請更殺一圍帝

從其言識者以為後主名緯殺圍言非吉徵及帝至晉
州城已欲沒矣作地道攻之城陷十餘步將士乘勢欲
入帝勅且止召淑妃共觀之淑妃糝點不獲時至周人
以木拒塞城遂不下舊俗相傳晉州城西石上有聖人
跡淑妃欲往觀之帝恐努矢及橋故抽攻城木造遠橋
監作舍人以不速成受罰帝與妃度橋橋壞至夜乃還
稱妃有功勲將立為左皇后即令使馳取禕翟等皇后
服御仍與之並騎觀戰東偏少却淑妃怖曰軍敗矣帝

遂以淑妃奔還至洪洞戍妃方以粉鏡自玩後聲亂唱賊至於是復走內參自晉陽以皇后衣至帝為按轡命妃著之然後去帝奔鄴太后後至帝不出迎淑妃將至鑿城北門出十里迎之復以淑妃奔青州後主至長安請周武帝乞淑妃帝曰朕視天下如脫屣一老嫗豈與公惜也仍以賜之及帝遇害以淑妃賜代王達甚嬖之淑妃彈琵琶因絃斷作詩曰雖蒙今日寵猶憶昔時憐欲知心斷絕應看膝上絃達妃為淑妃所譖幾置於死

達薨隋文帝將賜達妃兄李詢令著布裙配春詢母逼
令自殺後主以李祖欽女為左昭儀進為左娥英裴氏
為右娥英娥英兼取舜妃娥皇女英為名陽休之所制
樂人曹僧奴進二女大者嘗忤旨剝面皮少者以善彈
琵琶為昭儀以僧奴為日南王僧奴死又貴其兄弟妙
達等數人同日皆為郡王為昭儀別起隆基堂極為綺
麗陸媪誣以左道遂殺之又有董昭儀毛夫人彭夫人
王夫人小王夫人二李夫人皆嬖寵之毛能彈箏本和

士開薦入帝所幸彭夫人亦以音伎進死於晉陽造佛
寺與總持相將大李本隸戶女以五弦進小李即李貞
之女也小王嘗生一男毛兄思安驟升武衛董父賢義
由軍主超登開府自餘姻屬多至大官

後周

文皇后元氏魏孝武之妹也初封平原公主適開府張
歡歡性貪殘遇后無禮孝武殺歡改封后為馮翊公主
以配文帝生孝閔帝魏大統十七年薨恭帝三年十二

月合葬成陵孝閔踐阼追尊為王后武成初又追尊為皇后

文宣皇后叱奴氏代人也文帝為丞相納為姬生武帝天和二年六月尊為皇太后建德三年三月崩五月葬永固陵

孝閔皇后元氏名胡摩魏文帝第五女也初封晉陽公主帝之為略陽公也尚焉及踐阼立為皇后帝被廢后出俗為尼建德初武帝誅晉公護上帝尊號以后為孝

閔皇后居崇義宮周滅后出居里第隋大業十二年殂
明敬皇后獨孤氏太保衛公信之長女也帝之在藩納
為夫人二年正月立為皇后四月崩葬昭陵武成初追
崇為皇后明帝崩與后合葬焉

武成皇后阿史那氏突厥木杆可汗俟斤之女也突厥
既滅蠕蠕盡有塞表之地志陵中夏文帝方與齊人爭
衡結以為援俟斤初欲以女配帝既而悔之武帝即位
前後累遣使焉保定五年二月詔陳公純許公宇文貴

神武公竇毅南安公楊符等備皇后文物及行殿并六宮以下一百二十人至侯斤牙所迎后侯斤忽改圖將以后許齊純等累請不得反命會雷風大起飄壞其宮廬侯斤大懼以為天譴乃禮送后純等奉之以歸天和三年三月至武帝接以親迎之禮后有姿貌善容止帝深敬禮焉宣帝即位尊為皇太后大象元年二月改為天元皇太后隋開皇二年殂年三十二隋文詔有司備禮祔葬后於孝陵

武皇后李氏名娥姿楚人也于謹平江陵后家被籍没至長安文帝以后賜武帝後得親幸生宣帝宣政元年七月尊為帝太后大象元年二月改為天元帝太后七月又尊為天皇太后二年二月尊為天元聖皇太后宣帝崩靜帝尊為大帝太后隋開皇初出俗為尼名常悲八年殂以尼禮葬于京城南

宣皇后楊氏名麗華隋文帝之長女也帝在東宮武帝為帝納后為皇太子妃宣政元年閏六月立為皇后帝

後自稱天元皇帝號后為天元皇后尋又立天皇后及左右皇后與后為四皇后二年二月詔以后取象四星於是后及三皇后並加大馬冊授后為天元大皇后又立天中大皇后與后為五皇后焉后性柔婉不妬忌四皇后及嬪御等咸愛而仰之帝後昏暴滋甚喜怒乖度嘗譴后欲加之罪后進止詳閑辭色不撓帝大怒賜后死逼令引決后母獨孤氏詣閤陳謝叩頭流血然後得免帝崩靜帝尊后為皇太后居弘聖宮初宣帝不豫詔

隋文帝入禁中侍疾及大漸劉昉鄭譯等因矯詔以隋文帝受遺輔政后初雖不預謀然以嗣主幼冲恐權在他族不利於己聞昉譯已行此詔心甚悅後知隋文有異圖意頗不平及行禪代憤怨愈甚隋文內甚愧之開皇初封后為樂平公主後又議奪其志后誓不許乃止大業五年從煬帝幸張掖殂於河西詔還京所司備禮祔葬后于定陵

宣帝后朱氏名滿月吳人也其家坐事没入東宮宣帝

之為太子后被選掌衣服帝召幸之遂生靜帝大象元年四月立為天元帝后七月改為天皇后二年二月又改為天大皇后后本非良家子又年長於帝十餘歲疎賤無寵以靜帝故特尊崇之班亞於楊皇后焉宣帝崩靜帝尊后為帝太后隋開皇初出俗為尼名法靜六年殂以尼禮葬于京城西

宣帝后陳氏名月儀自云潁川人大將軍山提之第八女也大象元年六月以選入宮拜為德妃月餘立為天

左皇后二年二月改為天左大皇后頃之又詔以坤儀比德土數惟五四大皇后外增置天中大皇后一人於是以后為天中大皇后帝崩出俗為尼名華光永徽初終山提本爾朱兆之隸仕齊位特進開府東兗州刺史謝陽王武帝平齊拜大將軍封淅陽公大象元年以后父超授上柱國進鄆國公除大宗伯

宣帝皇后元氏名樂尚河南洛陽人開府晟之第二女也年十五被選入宮拜貴妃大象元年七月立為天右

皇后二年二月改為天右大皇后帝崩出俗為尼名華
勝初后與陳皇后同時被選入宮俱拜貴妃及升后又
同日受冊帝寵遇二后禮數均等年齒復同特相親愛
及為尼後李朱及尉遲后並相繼殞没而二后貞觀中
尚存晟少以元氏宗室拜開府大象初以后父進位上
柱國封翼國公

宣帝皇后尉遲氏名繁熾蜀公迴之孫女也有美色初
適杞公亮子西陽公溫以宗婦例入朝帝逼幸之及亮

謀逆帝誅温追后入宮拜長貴妃大象二年三月立為
天右大皇后帝崩出俗為尼名華道隋開皇十五年殂
靜帝司馬皇后名令姬柱國滎陽公消難之女也大象
元年二月宣帝傳位於帝七月為帝納后為皇后二年
九月隋文帝以后父奔陳廢為庶人後嫁為隋司州刺
史李丹妻貞觀初猶存

隋

文獻皇后獨孤氏諱伽羅河南洛陽人周大司馬衛公

信之女也信見文帝有奇表故以后妻焉時年十四帝與后相得誓無異生之子后姊為周明帝后長女為周宣帝后貴戚之盛莫與為比而后每謙卑自守及周宣帝崩隋文居禁中總百揆后使李圓通謂文帝曰騎虎之勢必不得下勉之及帝受禪立為皇后突厥嘗與中國交市有明珠一篋價值八百萬幽州總管陰壽白后市之后曰當今戎狄屢寇將士罷勞未若以八百萬分賞有功者百寮聞之畢賀文帝甚寵憚之帝每臨朝后

輒與上方輦而進至閣乃止使宮官伺帝政有所失隨時匡諫多所弘益候帝退朝而同反宴寢相顧欣然后早失二親常懷感慕見公卿有父母者每為致禮焉有司奏曰周禮百官之妻命於王后憲章具在請依古制后曰以婦人與政或從此漸不可開其源也不許后每謂諸公主曰周家公主類無婦德失禮於舅姑離薄人骨肉此不順事爾等當誡之后姑子都督崔長仁犯法當斬文帝以后故免之后曰國家之事焉可顧私長仁

竟坐死異母弟阼以猫鬼巫蠱祝詛於后坐當死后三日不食為之請命曰阼若蠹政害民者不敢言今坐為妾身請其命阼於是減一等后雅性儉約帝常合止利藥須胡粉一兩宮內不用求之竟不得又欲賜柱國劉嵩妻織成衣領宮中亦無上以后不好華麗有齊時七寶車及鏡臺絕巧麗帝使毀車而以鏡臺賜后后雅好讀書識達今古凡言事皆與上意合宮中稱為二聖嘗夢周阿史那后言受罪辛苦求營功德明日言之上為

立寺追福焉。后兄女夫死於并州，后嫂以女有娠，請不
赴葬。后曰：婦人事夫，何容不往？其姑在宜，自詔之。姑不
許，女遂行。后頗仁愛，每聞大理決囚，未嘗不流涕。然性
尤妬忌，後宮莫敢進御。尉遲迴女孫有美色，先在宮中。
帝於仁壽宮見而悅之，因得幸。后伺帝聽朝，陰殺之上。
大怒，單騎從苑中出，不由徑路，入山谷間，三十餘里。高
顯楊素等追及，扣馬諫。帝太息曰：吾貴為天子，不得自
由。高顯曰：陛下豈以一婦人而輕天下？帝意少解，駐馬。

良久夜方還宮后候上於閣內及帝至流涕拜謝頰素
等和解之上置酒極歡后自此意頗折初后以高頰是
父之家客甚見親禮至是聞頰謂己為一婦人銜之又
以頰夫人死其妾生男並不喜之漸加譖毀帝亦每事
唯后言是用后見諸王及朝士有妾孕者必勸帝斥之
時皇太子多內寵妃元氏暴薨后意太子愛妾雲氏害
之由是諷帝黜高頰竟廢太子立晉王廣皆后之謀也
仁壽二年八月甲子日暈四重己巳太白犯軒轅其夜

后崩於永安宮時年五十九葬於太陵其後宣華夫人陳氏容華夫人蔡氏俱有寵帝頗惑之由是發疾及危篤謂侍者曰使皇后在吾不及此云

宣華夫人陳氏陳武帝女也性聰慧姿貌絕好及陳滅配掖庭後選入宮為嬪時獨孤皇后性妬忌後宮罕得進御唯陳氏有寵煬帝之在藩也陰有奪宗之計規為內助每致禮馬進金蛇金駝等物以取媚於陳氏皇太子廢立之際頗有力焉及文獻皇后崩進位為貴人專

房擅寵主斷內事六宮莫與為比及帝大漸遺詔拜為
宣華夫人初帝寢疾於仁壽宮夫人與皇太子同侍疾
平旦更衣為太子所逼夫人距之得免歸於上所上怪
其神色有異問之夫人泣以實對帝恚曰畜生何堪付
大事獨孤誠誤我意謂獻皇后也因呼兵部尚書柳述
黃門侍郎元巖曰呼我兒述等呼太子帝曰勇也述巖
出閣為勅書訖示左僕射楊素素以白太子太子遣張
衡入寢遂令夫人及後宮同侍疾者並就別室俄而上

崩夫人與諸後官相顧曰事變矣皆色動股慄晡後太子遣使者齎金合帖紙於際親署封字以賜夫人夫人見惶懼以為鴆毒不敢發使者促之乃發見合中有同心結數枚諸宮人相謂曰得免死矣陳氏恚而却坐不肯致謝諸宮人共逼之乃拜使者其夜太子蒸馬場帝即位出居仙都宮尋召入歲餘而終時年二十九帝深悼之為製神傷賦

容華夫人蔡氏丹陽人也陳滅以選入宮為世婦容儀

婉嫕帝甚悅之以文獻后故希得進幸后崩漸見寵遇拜為貴人參斷宮掖亞於陳氏帝寢疾加號容華夫人帝崩後亦為煬帝所蒸

煬帝愍皇后蕭氏後梁明帝歸之女也荆揚間以二月生子者不舉后以二月生由是季父岌收養之未幾岌夫妻俱死轉養舅張軻家軻甚貧窶后躬親勞苦煬帝為晉王文帝選妃於梁卜諸女皆不吉歸乃迎后於舅氏令使者占之曰吉遂冊為妃后性婉順有智識好學

解屬文頗知占候文帝大善之煬帝甚寵敬焉及帝嗣位立為皇后帝每遊幸未嘗不隨從時后見帝失德心知不可不敢措言因為述志賦以自寄其意及帝幸江都臣下離貳有宮人白后曰外間人人欲反后曰任汝奏之宮人言於帝帝大怒曰非汝宜言乃斬之宮人復白后曰宿衛者往往耦語謀反后曰天下事一朝至此大勢已然無可救者何用言徒令帝憂煩耳自是無復言者及宇文化及之亂隨軍至聊城化及敗沒於竇建

德建德妻曹氏妬悍煬帝妃嬪美人並使出家并后置於武彊縣是時突厥處羅可汗方盛其可賀敦即隋義城公主也遣使迎后建德不敢留遂攜其孫正道及諸女入於虜庭唐貞觀四年破突厥皆以禮致之歸於京師賜宅於興道里二十一年殂詔以皇后禮於揚州合葬於煬帝陵諡曰愍

通志卷二十



總校官庶吉士臣侍朝

校對官庶吉士臣嚴福

謄錄監生臣朱溥